

四庫全書

史部

欽定四庫全書

水經注釋卷二十五

仁和趙一清撰

泗水 沂水 洙水

泗水出魯下縣北山

地理志曰出濟陰乘氏縣又云出卞縣北

閭氏若璩潛丘劉記

曰泗水出乘氏此出字乃後人所加班固自注原無出字漢書未可輕也一清按地志卞縣下亦無出字

經言北山皆為非矣山海經曰泗水出魯東北余昔

因公事泌歷徐沆路逕洙泗因令尋其源流水出卞縣故城東南桃墟西北春秋昭公七年謝息納季孫之言以孟氏成邑與晉而遷于桃杜預曰魯國卞縣

東南有桃墟

一清按舜後姓姚又賜姓姚此桃墟當因姚墟而訛汚水亦有姚墟姚墟之稱

也世謂之曰陶墟舜所陶處也井曰舜井皆為非也

墟有漏澤方一十五里渌水微渟三丈如減澤西際阜俗謂之媯亭山蓋因陶墟舜井之言因復有媯亭之名矣阜側有三石穴廣圓三四尺穴有通否水有盈

漏漏則數夕之中傾陂竭澤矣左右民居識其將漏預以木為曲洑約障穴口魚鼈暴鱗不可勝載矣自此連岡通阜西北四十許里岡之西際便得泗水之源也博物志曰泗出培尾蓋斯阜者矣石穴吐水五泉俱導泉穴忽徑尺餘水源南側有一廟栝柏成林時人謂之原泉祠非所究也泗水西逕其縣故城南春秋襄公二十九年季武子取卞曰聞守卞者將叛臣率徒以討之是也南有姑蔑城春秋隱公元年公

及邾儀父盟于蔑者也水出二邑之間西逕郛城北
春秋文公七年經書公伐邾三月甲戌取須句遂城
郛杜預曰魯邑也卞縣南有郛城備邾難也泗水自
卞而會于邾水也

西南過魯縣北

泗水又西南流逕魯縣分為二流水側有一城為二
水之分會也北為洙瀆春秋莊公九年經書冬浚洙
京相璠服虔杜預並言洙水在魯城北浚深之為

齊備也南則泗水夫子教于洙泗之間今於城北二
水之中即夫子領徒之所也從征記曰洙泗二水交
於魯城東北十七里闕里背洙面泗南北一百二十
步東西六十步四門各有石閭北門去洙水百步餘
後漢初闕里荆棘自闕從講堂至九里鮑永為相因
修饗祠以誅魯賊彭豐等郭緣生言泗水在城南非
也余按國語宣公夏濫于泗淵里革斷罟棄之韋昭
云泗在魯城北

一清按曰知錄公羊閔公二年傳桓公使高子將南陽之甲立僖公而城

魯或曰自鹿門至於爭門者也或曰自爭門至於吏門者也注鹿門魯南城東門也據左傳臧紇斬鹿門之闢出奔洙是也爭門吏門並闢按說文淨魯城門池也从水爭聲士耕切是爭門即以此水名省文作爭爾後人以潄字省作淨音才性切而楚書用之自南北史以下俱為才性之淨而魯之爭門不復知之今考道元所記魯城北為泗水則史記冢墓記王隱此地當是引泗以為濠而失記之

地道記咸言葬孔子於魯城北泗水上今泗水南有

夫子冢春秋孔演圖曰烏化為書孔子奉以告天赤

爵銜書上化為黃玉刻曰孔提命作應法為赤制說題

辭曰孔子卒以所受黃玉葬魯城北即子貢廬墓處

也譙周云孔子死後魯人就冢次而居者百有餘家
命曰孔里孔叢曰夫子墓塋方一里在魯城北六里
泗水上諸孔氏封五十餘所人名昭穆不可復識有
銘碑三所獸碣具存皇覽曰弟子各以四方奇木來
植故多諸異樹不生棘木刺草今則無復遺條矣泗
水自城北南逕魯城西南合沂水沂水出魯城東南
尼邱山西北山即顏母所祈而生孔子也山東一十
里有顏母廟山南數里孔子父葬處禮所謂防墓崩

者也平地發泉流逕魯縣故城南水北東門外即爰
居所止處也國語曰海鳥曰爰居止於魯城東門之
外三日臧文仲祭之展禽譏焉故莊子曰海鳥止郊
魯侯觴之奏以廣樂具以太牢三日而死此養非所
養矣門郭之外亦戎夷死處呂氏春秋曰昔戎夷違
齊如魯天大寒而後門與弟子宿於郭門外寒愈甚
謂弟子曰子與我衣我活我與子衣子活我國士也
為天下惜子不肖人不足愛弟子曰不肖人惡能與

國士并衣哉戎歎曰不濟夫解衣與弟子半夜而死
沂水北對稷門昔圉人犂有力能投盖于此門服虔
曰能投千鈞之重過門之上也杜預謂走接屋之桷
反覆門上也春秋僖公二十年經書春新作南門左
傳曰書不時也杜預曰本名稷門僖公更高大之今
猶不與諸門同故曰高門也其遺基猶在地八丈餘
矣亦曰雩門春秋左傳莊公十年公子偃請擊宋師
竊從雩門蒙臯比而出者也門南隔水有雩壇壇高

三丈曾點所欲風舞處也高門一里餘道西有道兒
君碑是魯相陳君立昔曾參居此魯不入境縣即曲
阜之地少昊之墟有大庭氏之庫春秋豎牛之所攻
也故劉公幹魯都賦曰戢武器於有炎之庫放戎馬
於巨野之垆周武王封姬旦於曲阜曰魯秦始皇二
十三年以為薛郡漢高后元年為魯國

金氏曰按是
文引漢志然

實班氏之訛也高后以城陽為魯
國不以薛郡其時薛郡屬楚國

阜上有季氏宅宅

有武子臺今雖崩夷猶高數丈臺西百步有大井廣

三丈深十餘丈以石壘之石似磬制春秋定公十二年公山不狃帥費人攻魯公入季氏之宮登武子之臺也臺之西北二里有周公臺高五丈周五十步臺南四里許則孔廟即夫子之故宅也宅大一頃所居之堂後世以為廟漢高祖十三年過魯以太牢祀孔子自秦燒詩書經典淪缺漢武帝時魯共王壞孔子舊宅得尚書春秋論語孝經時人已不復知有古文謂之科斗書漢世秘之希有見者于時聞堂上有金

石絲竹之音乃不壞矣廟屋三間夫子在西面東向
顏母在中間南面夫人隔東一間東向夫子牀前有
石硯一枚作甚朴云平生時物也魯人藏孔子所乘
車於廟中是顏路所請者也獻帝時廟遇火燒之永
平中鍾離意為魯相到官出私錢三千文付戶曹孔
訢治夫子車身入廟拭几席劍履男子張伯除堂下
草土中得玉璧七枚伯懷其一以六枚白意意令主
簿安置几前孔子寢堂牀首有懸甕意召孔訢問何

等甕也對曰夫子甕也背有丹書人勿敢發也意曰

夫子聖人所以遺甕欲以懸示後賢耳發之中得素

書文曰後世修吾書董仲舒護吾車拭吾履發吾筭

會稽鍾離意壁有七張伯藏其一意即召問伯果服

焉魏黃初二年

金石錄跋尾曰魏志文帝以黃初二年正月下詔今以碑考之乃黃初元

年詔語亦小異當以碑為正也

文帝令郡國修起孔子舊廟置百戶

吏卒

一清按原本作百夫吏卒誤也曹植撰孔羨奉家祀碑作百戶吏卒今是碑載隸釋闕里志作

百戶吏史三國志魏紀黃初二年以議郎孔羨為宗聖侯邑百戶奉孔子祀今魯郡修起舊廟置百戶吏卒

以守衛之與碑足相證明隸釋闕里志所改則非也而顧炎武金石文字記云百石卒史著秩百石之卒史也漢書儒林傳郡國置五經百石卒史倪寬傳補廷尉文學卒史臣瓚曰漢注卒史秩百石是也然其自注又云杜氏通典作百戶吏卒三國志同蓋未能審定爾何焯曰亭林但據桓帝永興元年魯相乙瑛置孔子廟百石卒史不知黃初自置百戶吏卒未可執此例彼也百石卒史掌領禮器選年四十以上經通六藝雜試通利能奉宏先聖之禮為宗所歸者乃自孔氏子孫為之百戶吏卒則守衛之人耳廟

有夫子像列二弟子執卷立侍穆穆有詢仰之容漢

魏以來廟列七碑二碑無字括柏猶茂

一清按注云廟列七碑二

碑無字則五碑有文字可知矣並見隸釋一孔廟置守廟百石孔龢碑咸宗永興元年一魯相韓勅造孔

廟禮器碑永壽二年一韓勅修孔廟後碑永壽三年
一魯相史晨祠孔廟奏銘靈帝建寧二年一史晨饗
孔廟後碑俱云水經有故知即是七碑中之五碑也
孔宏復闕里志云語云世遠言湮文獻難徵之謂也
曲阜為天下宗國歷代表揚無遺矣累朝典禮疆域
規模陵廟增釋猶多湮沒惟水經注存漢魏之迹東
遊記詳魯疆之概斯文不亡闕里之幸
也東遊記是元皇慶中紫陽楊奐著 廟之西北二

里有顏母廟廟像猶嚴有修栝五株孔廟東南五百
步有雙石闕即靈光之南闕北百餘步即靈光殿基
東西二十四丈南北十二丈高丈餘東西廊廡別舍
中間方七百餘步闕之東北有浴池方四十許步池

中有釣臺方十步臺之基岸悉石也遺基尚整故王延壽賦曰周行數里仰不見日者也是漢景帝程姬子魯共王之所造也殿之東南即泮宮也在高門直北道西宮中有臺高八十尺臺南水東西一百步南北六十步臺西水南北四百步東西六十步臺池咸結石為之詩所謂思樂泮水也泮水又西逕圓丘北丘高四大餘泮水又西流昔韓雉射龍於斯水之上尸子曰韓雉見申羊於魯有龍飲於泮韓雉曰吾聞

之出見虎搏之見龍射之今弗射是不行吾聞也遂射之沂水又西右注泗水者也

又西過瑕丘縣東屈從縣東南流鄆水從東來注之

瑕丘魯邑春秋之負瑕矣哀公七年季康子伐邾因諸負瑕是也應劭曰瑕丘在縣西南昔衛大夫公叔文子升於瑕丘蘧伯玉從文子曰樂哉斯丘死則我欲葬焉伯玉曰吾子樂之則瑗請前刺其欲害民良田也瑕丘之名蓋因斯以表稱矣曾子弔諸負夏鄭

元皇甫謐並言衛地魯衛雖殊土則一也

危林曰縣邑同號地

志已多于時魯有瑕丘何知衛無茲壘周之典制國有分土行李所過聚櫟是防若瑕丘獨為魯田寸壤皆非衛有未聞衛命介使憑覽敵國之墟而終沒大夫卜甯強隣之陌者也且此處所敘成在邾魯封域忽入衛事于理殊乘又負夏可為負瑕則虞舜所遷豈亦在是乎一清按衛瑕丘在今開州東南三十里秦置濮陽郡即衛之帝邱成公自楚丘來遷者也公叔之云宜在彼地道元誤以魯瑕丘當之誠如方叔

所譏鄆水出東海合鄉縣漢和帝永寧九年封馬光子

復為侯國

一清按此注皆誤據范史云永初七年復紹封光子朗為合鄉侯則復非其名且事

在安帝永初七年非和帝永寧九年永寧亦安帝紀年次年之七月即改建元元年也

其水西

南入邾春秋哀公二年季孫斯伐邾取鄆東田及沂
西田是也鄆水又逕魯國鄆山東南而西南流春秋
左傳所謂嶧山也邾文公之所遷今城在鄆山之陽
依巖岨以墉固故邾婁之國曹姓也叔梁紇之邑也
孔子生于此後乃縣之因鄆山之名以氏縣也全氏曰以
鄆為鄆則孔子乃邾婁國人耶善長可謂大繆矣王莽之鄆亭矣京相璠曰
地理志嶧山在鄆縣北一清按漢志作嶧縣繹邑之所依以為
名也山東西二十里高秀獨出積石相臨殆無土壤

石間多孔穴洞達相通往往有如數間屋處其俗謂之嶧孔遭亂輒將處人入嶧外寇雖衆無所施害晉永嘉中太尉郗鑒將鄉曲保此山胡賊攻守不能得今山南有大嶧名曰郗公嶧山北有絕巖秦始皇觀禮於魯登於嶧山之上命丞相李斯以大篆勒銘山頂名曰書門詩所謂保有鳧嶧者也鄆水又西南逕蕃縣故城南又西逕薛縣故城北地理志曰夏車正仲奚之國也竹書紀年梁惠成王三十一年卻遷于

薛改名徐州城南山上有奚仲冢晉太康地記奚仲
冢在城南二十五里山上百姓謂之神靈也齊封田
文於此號孟嘗君有惠喻今郭側猶有文冢結石為
郭作制嚴固瑩麗可尋行人往還莫不經觀以為異
見矣鄆水又西逕仲虺城北晉太康地記曰奚仲遷
于邳仲虺居之以為湯左相其後當周爵稱侯後見
侵削霸者所紂為伯任姓也應劭曰邳在薛徐廣史
記音義曰楚元王子邳客以呂后二年封上邳侯也

有下故此為上矣晉書地道記曰仲虺城在薛城西
三十里鄆水又西至湖陸縣入于泗故京相璠曰薛
縣鄆水首受蕃縣西注山陽湖陸是也經言瑕丘東
誤耳

入南過平陽縣西

縣即山陽郡之南平陽縣也竹書紀年曰梁惠成王
二十九年齊田釐及宋人伐我東鄙圖平陽者也王
莽改之曰颶平矣泗水又南逕故城西世謂之漆陽

應劭十三州記曰漆鄉洙邑也杜預曰平陽東平有漆鄉郭今見有故城西南方二里所未詳也

又南過高平縣西洸水從西北來流注之

泗水南逕高平山山東西十里南北五里高四里衆山相連其山最高頂上方平故謂之高平山縣亦取名焉泗水又南逕高平縣故城西漢宣帝地節三年

封丞相魏相為侯國

全氏曰姜宸英曰此二句是後人所妄加蓋善長既知高平是

王莽所改則魏相所封非此高平明矣豈尚引之乎何焯曰弱翁所封蓋臨淮之高平地志注曰侯國者

也予按漢表高平屬柘柘是淮陽之屬縣
也一清按今江南宿遷縣疑是弱翁封邑
高帝八年

封將軍陳錯為索侯

全氏曰按八年當作七年陳錯漢表作陳錯沈氏曰索今史漢

表皆作索誤也小司馬曰屬山陽則是索矣臣瓚曰音拓然師古註漢表讀作公老翻是唐人已誤索為索矣一清按郡國志亦作索東平憲王傳仍是索字索之與索未能一定寧得據志以駁表乎地理

志曰縣故山陽之索也

全氏曰按漢志無是丈

王莽改曰高平

應劭曰章帝改按本志曰王莽更名章帝因之矣所

謂洸水者洙水也蓋洸洙相入互受通稱矣

又南過方與縣東

漢哀帝建平四年縣女子田無嗇生子先未生二月
兒號腹中及生不舉葬之陌上三日人過聞號聲母
掘養之

荷水從西來注之

荷水即沛水之所苞注以成湖澤也而東與泗水合
於湖陵縣西六十里穀庭城下俗謂之黃水口黃水
西北通巨野澤蓋以黃水沿注于荷故因以名焉

禹貢

雖指曰地記之言水也凡二水大小相敵既合流自
下皆得通稱多至五六水亦然漢志魯國卞縣泗水

至方輿入沖說丈泗受濟水東入淮其所謂濟卽荷水也又漢志蕃縣南梁水西至湖陵入濟渠鄴善長云濟在湖陵西而左注泗泗濟合流地記或言濟入泗泗亦言入濟故有入濟之丈按觀魚臺下臨荷水而公羊傳以崇為濟上邑則以荷為濟漢初已然故班固謂泗入濟許慎謂泗受濟而不言荷以荷卽濟也水經濟水篇所叙自乘氏以至湖陵卽分濟之荷自沛縣以至睢陵卽入淮之泗而皆以爲濟水蓋水漢志以立丈也然又云濟水東至乘氏縣西分爲二南爲荷水北爲濟瀆而泗水篇則自方與受荷以至睢陵入淮皆以爲泗水是又與禹貢合水經非一時一手作觀于此而益驗竊謂濟雖小水而能專達于海故得與四瀆之列使合泗入淮者亦濟則是因淮以達海矣安得謂之瀆禹主名山川不相假借而後世地記以荷泗爲濟本支不分大戾經旨不詳辨之何以使禹貢之書著明如日月哉

又屈東南過湖陸縣南涓涓水從東北來流注之

地理志曰故湖陵縣也葑水在南王莽更曰湖陸應

劭曰尚書一名湖陵章帝封東平王蒼子為湖陵侯

更名湖陵也

一清按此注全是襲用漢志而又誤者漢志山陽郡湖陵縣下云禹貢浮于淮

泗通于河水在南莽曰湖陸應劭曰尚書一名湖章

帝封東平王蒼子為湖陵侯更名湖陵通于河據說

文是達于葑一名湖之湖亦當是葑字蓋仲瑗引尚

書之葑以証世本漢書通于河之誤傳寫者更訛而

為湖道元不察又加陵字遂有尚書一名湖陵之繆

詞此鄭氏之疎非應氏之過又按後漢書光武帝紀

建武五年幸沛進幸湖陵則復號不始于章帝抑或

史家追書之詞耶更考郡國志山陽郡湖陸故湖陵

章帝更名劉昭補註云前漢志王莽改曰湖陸章帝復其號晉以後摠曰湖陸經文陸字疑亦後人所改

泗水又東逕郝鑒所築城東南昔桓溫之北入也范

曄擒慕容忠於此城東有度尚碑

一清按隸釋有漢荆州刺史度尚碑

尚字博平山陽湖陸人威宗永康元年立洪适曰此碑在湖陸荒野政和壬辰巡檢王當世見之始遷于官廨其後邑令滕君欲徙碑于渾舟三載而三度繼因大水漲沒不出劉宗儀攝事乃能立之使星亭云

泗水又左會南梁水地理志曰水出蕃縣今縣之東

北平澤出泉若輪焉發源成川西南流分為二水北

水枝出西逕蕃縣北又西逕滕城北春秋左傳隱公

十一年滕侯薛侯來朝爭長薛侯曰我先封滕侯曰
我周之卜正也薛庶姓也我不可以後之公使羽父
請薛侯曰君辱在寡人周諺有之曰山有木工則度
之賓有禮主則擇之周之宗盟異姓為後寡人若朝
于薛不敢與諸任齒君若辱貺寡人則願以滕君為
請薛侯許之乃長滕侯者也漢高祖封夏侯嬰為侯
國號曰滕公

全氏曰夏侯嬰嘗為滕令故號滕公
非封于滕也嬰封汝陰善長誤矣 鄧

晨曰今沛郡公邱也其水又溉於邱焉縣故城在滕

西北城周二十里內有子城按地理志即滕也周懿

王子錯叔繡文公所封也

朱氏謀瑋箋曰漢志沛郡公邱縣注謂滕是周懿王

子錯叔繡所封故注仍其說一清按顏師古亦云未詳其義蓋古傳記有之第文公字又未知所出耳

齊滅之秦以為縣漢武帝元朔三年封魯共王子劉

順為侯國世以此水溉我良田遂及百秭故有兩溝

之名焉南梁水自枝渠西南逕魯國蕃縣故城東俗

以南隣於鄆亦謂之西鄆水南梁水又屈逕城南應

劄曰縣古小邾邑也地理志曰其水西流注于沛清

按漢志魯國蕃縣南梁水西至湖陵入沛渠當作濟

濟在湖陸西而左注泗

泗濟合流故地記或言濟入泗泗亦言入濟互受通稱故有入沛之文閼駟十三州志曰西至湖陸入泗是也經無南渠之名而有涓涓之稱疑即是水也戴延之西征記亦言湖陸縣之東南有涓涓水亦無記於南梁謂是吳王所導之瀆也余按湖陸西南止有是水延之蓋以國語云吳王夫差起師將北會黃池掘溝於商魯之間北屬之沂西屬于濟以是言之故

謂是水為吳王所掘非也余以水路求之止是泗川耳蓋北達沂西北逕於商魯而接於濟吳所浚廣耳非謂起自東北受沂西南注濟也假之有通非吳所趣年載誠眇人情厠近以今忖古益知延之之不通情理矣泗水又南潞水注之又逕薛之上邳城西而南注者也

全氏曰前已言潞水自湖陸入泗矣此又忽出潞水逕上邳南注泗之大不幾複與

偽所謂西

潞水近是

又南過沛縣東

昔許由隱於沛澤即是縣也縣蓋取澤為名宋滅屬
楚在泗水之濱於秦為泗水郡治黃水注之黃水出
小黃縣黃鄉黃溝國語曰吳子會諸侯于黃池者也
黃水東流逕外黃縣故城南張晏曰魏郡有內黃縣
故加外也薛瓚曰縣有黃溝故縣氏焉圜稱陳留風
俗傳曰縣南有渠水於春秋為宋之曲棘里故宋之
別都矣春秋昭公二十五年宋元公卒於曲棘是也
宋華元居於稷里宣公十五年楚鄭圉宋晉解揚

清一

按下有脫字

楚圍致命于此宋人懼使華元乘闌夜入楚

師登子反之床

全氏曰乘闌是穀梁傳文登床是左氏傳文善長合而成書

曰寡

君使元以病告敝邑易子而食析骸以爨城下之盟

所不能也子反退一舍宋楚乃平今城東闌上猶有

華元祠祠之不輟城北有華元冢黃溝自城南東逕

葵邱下春秋僖公九年齊桓公會諸侯于葵邱宰孔

曰齊侯不務德而勤遠畧北伐山戎南伐楚西為此

會東畧之不知西則否矣其在亂乎君務靖亂無勤

於行晉侯乃還即此地也黃溝又東注大澤蒹葭莞
葦生焉即世所謂大薺陂也陂水東北流逕定陶縣

南又東逕山陽郡成武縣之楚邱亭北

一清按此即班固誤以為

衛文公所遷之楚邱而道元因之然分註云有楚邱亭則以城武本有此名耳乃春秋戎伐凡伯之地詳

見濟水注

黃溝又東逕郛城北成武縣故城南王莽更之

曰成安也黃溝又東北逕郛城北春秋桓公二年經
書取郛大鼎于宋戊申納于太廟左傳曰宋督攻孔
父而取其妻殺殤公而立公子馮以郛大鼎賂公臧

伯一清按傳是哀伯此鄭氏誤記諫為非禮十三州志曰今成武縣

東南有郛城俗謂之北郛者也黃溝又東逕平樂縣故城南又東右合泡水即豐水之上源也水上承大薺陂東逕貫城北又東逕己氏縣故城北王莽之己善也縣有伊尹冢崔駰曰殷帝沃丁之時伊尹卒葬于薄皇覽曰伊尹冢在濟陰己氏平利鄉皇甫謐曰伊尹年百餘歲而卒大霧三日沃丁葬以天子之禮親自臨喪以報大德焉又東逕孟諸澤杜預曰澤在

梁國睢陽縣東北又東逕郛城縣故城南地理志曰
山陽縣也王莽更名之曰告成矣故世有南部北部
之論也又東逕單父縣故城南昔宓子賤之治也孔
子使巫馬期觀政入其境見夜漁者問曰子得魚輒
放何也曰小者吾大夫欲長育之故也子聞之曰誠
彼形此子賤得之善矣惜哉不齊所治者小也王莽
更名斯縣為利父矣世祖建武十三年封劉茂為侯
國又東逕平樂縣右合泡水水上承淮水於下邑縣

界東北注一水上承淮水於杼秋縣界北流

一清按兩淮水

俱是睢水之誤漢下邑縣在今河南歸德府夏邑縣西南睢水在縣東南漢杼秋縣在江南徐州府豐縣西七十五里睢水在縣南五十里蓋睢河自河南陳留縣東北分河水東南流逕商邱夏邑永城以達于江南之豐縣而下入徐宿二州二泡之水一于下邑分睢者獲水也一于杼秋分睢者穀水也而統謂之睢則以獲水與睢水合流入泗穀水亦入泗與睢水往復逕通互攝兼二泡下流乃有豐水之目可知淮字與睢形似致訛

世又謂之瓠盧溝水積為渚渚水東北流

二渠雙引左合豐水俗謂之二泡也自下豐泡並得

通稱矣故地理志曰平樂侯國也泡水所出又逕豐

西澤謂之豐水漢書稱高祖送徒麗山徒多亡到豐
西澤有大蛇當徑拔劍斬之此即漢高祖斬蛇處也
又東逕大堰水分為二又東逕豐縣故城南王莽之
吾豐也水側城東北流右合枝水上承豐西大堰派
流東北逕豐城北東注豐水豐水又東合黃水時人
謂之狂水蓋狂黃聲相近俗傳失實也自下黃水又
兼通稱矣水上舊有梁謂之泡橋王智深宋史云宋
太尉劉義恭於彭城遣軍主嵇元敬北至城覘候魏

軍魏軍於清西望見元敬士衆魏南康侯杜道儁引趣泡橋沛縣民逆燒泡橋又於林中打鼓僞謂宋軍大至爭渡泡水水深酷寒凍溺死者殆半清水即泡

水之別名也

全氏曰濟水入汶謂之清水昨水入泗亦謂之清水六朝所爭皆泗上之清水

而非濟水也其地有曰清西則元嘉二十七年魏將拓跋建自清西屯蕭城曰清東則魏將步尼公自清東屯留城曰清南則天監五年梁將藍懷恭築城清南曰清中則永明三年齊角城戍主張蒲入清中是也宋沈攸之魏尉元齊周山圖所爭皆在其地以其為泗水合昨水入淮之地故亦謂之昨清口泰始三年宋將陳顯達引兵入昨清口是也建元三年齊角城將李安民敗魏師于孫谿渚胡三省曰渚在清水

之濱一清按泡水泡橋通
鑑俱作苞字蓋文異耳 沈約宋書稱魏軍欲渡清

西非也

一清按宋史索虜傳楚王樹洛真南康侯杜道儒進軍清西至蕭城步尼公進軍清東至

留城乃清東之軍既遇稽元敬還趨泡橋則自東而西今云魏軍欲渡清西似失當時形勢矣 泡水

又東逕沛縣故城南秦末兵起蕭何曹參迎漢高祖

於此城高帝十一年封合陽侯劉仲子為侯國

一清按史

漢表傳沛侯澤即高祖兄劉仲之子後封吳王國除

城內有漢高祖廟廟有三

碑後漢立廟基以青石為之階陛尚存劉備之為徐

州也治此表術遣紀靈攻備備求救呂布布救之屯

小沛招靈請備共飲布謂靈曰元德布弟也布性不
意合鬪但意解鬪乃植戟於門布彎弓曰觀布射戟
小支中者當各解兵不中可留決鬪一發中之遂解
此即布射戟支處也述征記曰城極大四周塹通豐
水豐水於城南東注泗即泡水也地理志曰泡水自
平樂縣東北至沛入泗者也一清按漢志山陽郡平樂縣淮水東北至沛入泗道元兩引班書俱作泡水淮字誤明嘉靖年刊本尚作包字惟去水傍耳猶可按也泗水南
逕小沛縣東縣治故城南坨上東岸有泗水亭漢祖

為泗水亭長即此亭也故亭今有高祖廟廟前有碑
延熹十年立廟闕崩褫略無全者水中有故石梁處
遺石尚存高祖之破黥布也過之置酒沛宮酒酣歌
舞慷慨傷懷曰遊子思故鄉也泗水又東南流逕廣

戚縣故城南漢武帝元朔元年封劉澤為侯國

全氏曰按

善長引史漢表之例王子侯必稱某王之名則此
大當云魯共王子子擇擇漢表作將今云澤亦誤也王

莽更之曰力聚也泗水又逕留縣而南逕垞城東城
西南有崇侯虎廟道淪遺愛不知何因而遠有此圖

泗水又南逕宋大夫桓魋冢西山枕泗水西上盡石
鑿而為冢今人謂之石郭者也郭有二重石作工巧
夫子以為不如死之速朽也

又東南過彭城縣東北

泗水西有龍華寺是沙門釋法顯遠出西域浮海東
還持龍華圖首創此制法流中夏自法顯始也其所
持天竺二石仍在南陸東基堪中其石尚光潔可愛
泗水又南淮水入焉而南逕彭城縣故城東

一清按
泗水手

下邳淮陰入淮所謂淮泗之會卽角城也彭城之境
未為淮水所逕疑是睢水之誤杜元凱所謂睢水首
受汴渠東經陳留梁周顯王四十二年九鼎淪沒泗
汴彭城入泗者也

淵秦始皇時而鼎見於斯水始皇自以德合三代大
意使數千人沒水求之不得所謂鼎伏也亦云系而
行之未出龍齒齧斷其系故語曰稱樂大早絕鼎系

當是孟浪之傳耳

全氏曰按周鼎何以過彭城而沒泗水李復疑之舊矣且赧王五十

九年而亡次年秦始皇取九鼎見于周本紀上距顯王
四十二年乃惠文王之十一年顯王又六年而崩間
以慎靚王六年至赧王之五年乃武王之元年其八
年武王薨據甘茂傳武王葬周蓋舉鼎絕脈而死則

是時鼎猶未入泗又歷五十一年而九鼎始不係以道里計之浮河入渭即至秦土豈由泗乎又況在六十二年之前也其妄明矣史記封禪書又謂宋太邱社亡而鼎沒泗水是周鼎早在宋也夫周鼎何以在宋太邱之社更不可曉矣且使果然則事在顯王三十三年又前乎此亦非四十二年又秦始皇紀是祠泗水以求鼎非鼎見也張守節曰赧王十九年秦昭王取九鼎其一飛入泗水其八入秦是又一說也

泗水又逕龔勝墓南墓碣尚存又逕亞父冢東皇覽

曰亞父冢在廬江縣郭東居巢亭中有亞父井吏民親事皆祭亞父於居巢廳上後更造祠于郭東至今祠之按漢書項羽傳歷陽人范增未至彭城而發疽

死不言之居巢今彭城南有項羽涼馬臺臺之西南
山麓上即其冢也增不慕范蠡之舉而自絕於斯可
謂褊矣推考書事墓近於此也

又東南過呂縣南

呂宋邑也春秋襄公元年晉師伐鄭及陳楚子辛救
鄭侵宋呂留是也縣對泗水漢景帝三年有白頸烏
與黑烏鬪於縣白頸烏不勝墮泗水中死者數千京
房易傳曰逆親親厥妖白黑烏鬪時有吳楚之反泗

水之上有石梁焉故曰呂梁也昔宋景公以弓工之
弓彎弧東射矢集彭城之東飲羽於石梁卽斯梁也
懸濤湧湊實為泗嶮孔子所謂魚鼈不能游又云懸
水三十仞流沫九十里今則不能也蓋惟嶽之喻朱

便極天明矣

一清按呂梁洪之險道元時已不能如
古矣至明嘉靖二十三年管河主事陳

洪範惡其石破害運船鑿之
使平而禹迹蕩然無存矣

晉太康地記曰水出磬

石書所謂泗濱浮磬者也泗水又東南流丁溪水注
之溪水上承泗水於呂縣東南流北帶廣陘山高而

注于泗川泗水冬春淺澁常排沙通道是以行者多
從此溪即陸機行思賦所云乘丁水之捷岸排泗川
之積沙者也晉太元九年左將軍謝元於呂梁遣督
護聞人夔用工九萬擁水立七埭以利漕運

又東南過下邳縣西

泗水歷縣逕葛嶧山東

一清按漢志東海郡下邳縣葛嶧山在西古文以為嶧易

卽奚仲所遷邳嶧者也泗水又東南逕下邳縣故城
西東南流沂水流注焉故東海屬縣也應劭曰奚仲

自薛徙居之故曰下邳也漢徙齊王韓信為楚王都
之後乃縣焉王莽之閏儉矣東陽郡治文穎曰秦嘉
東陽郡人今下邳是也晉灼曰東陽縣本屬臨淮郡

明帝分屬下邳後分屬廣陵故張晏曰東陽郡今廣

陵郡也漢明帝置下邳郡矣

一清按漢書高帝紀云東陽甯君秦嘉立景駒

為楚王註引文穎曰秦嘉東陽郡人為甯縣君晉灼曰東陽縣也臣瓚曰陳勝傳云凌人秦嘉然則嘉非東陽人嘉初起於郟號大司馬又不為甯縣君東陽甯君自一人秦嘉又一人史記項籍本紀裴駟集解引陳涉世家云

秦嘉廣陵人

城有三重其大城中有大司馬石苞

鎮東將軍胡質司徒王渾監軍石崇四碑南門謂之

白門魏武擒陳宮于此處矣

庾林曰白門所禽者乃奉先非公臺也唐太子

賢注范曄書引此注蓋未知善長之誤也

中城呂布所守也小城晉中興

北中郎將荀美郝曇所治也昔太山吳伯武少孤與

弟文章相失二十餘年遇于縣市文章欲歐伯武心

神悲痛因相尋問乃兄弟也縣為沂泗之會也又有

武原水注之水出彭城武原縣西北會注陂南逕其

城西王莽之和樂亭也縣東有徐廟山山因徐徙即

以名之也山上有石室徐廟也武原水又南合武水

謂之洳水

全氏曰漢志太山郡南武陽縣冠石山治水所出南至下邳入泗應劭曰武水所出

南入泗水經注則以為洳水而不云出冠石山至沂水篇注云治水出南武陽之冠石山顧不云入泗而

云入沂其南逕剛亭城又南至下邳入泗謂之武原

水口也又有桐水一清按漢志作桐水出西北東海容丘縣東

南至下邳入泗泗水東南逕下相縣故城東王莽之

從德也城之西北有漢太尉陳球墓墓前三碑是

弟子管寧華歆等所造

金石錄目錄百四十九漢太尉陳球碑光和元年百五十

漢陳球後碑百五十一漢陳球碑陰隸釋跋曰水經云下邳陳球墓前有三碑是弟子管寧華歆等造此所見皆故吏故民而無管華姓名豈與劉寬碑相類其一則弟子所立乎又曰陳公兩碑皆在淮陽莫識為先後趙氏但有一碑陰而水經謂墓前有三碑似亦指碑陰為一碑也一清按洪景伯之言非也鄭注明云墓前有三碑弟子管寧華歆等所造今隸釋所載三碑皆無管華姓名則弟子所立一碑已亡故金石錄僅有二碑而乃以碑陰充數何耶

初平四年曹操攻徐州破之拔取慮睢陵夏丘等縣以其父避難被害於此屠其男女十萬泗水為之不流自是數縣人無行跡亦為暴矣泗水又東南得睢水口泗水又逕宿預城之西又

遷其城南故下邳之宿留縣也王莽更名之曰康義

矣

全氏曰水經注引漢志有為今書所無者或是闕文然亦有絕非闕文而出于酈氏之妄者西京無

下邳郡下邳東海郡之屬縣耳安得下邳郡有宿留縣乎本無此縣又何以云王莽更名之曰康義乎一清按宿預故城在今邳州宿遷縣東南漢臨淮郡公猶縣之境也東漢省晉義熙中置宿預縣班志公猶縣下云莽曰秉義康秉字形相似道元引之蓋實宿預之即公猶也而不著公猶之名是其疎畧之過如以為造作無端則太甚矣晉元皇之為安東也督運軍儲而為邳

閣也魏太和中南徐州治後為戍梁將張惠紹北入水軍所次憑固斯城更增修廓塹其四面引水環之

今城在泗水之中也

又東南入于淮

泗水又東逕淩柵南西征記曰舊淩縣之治也泗水
又東南逕淮陽城北城臨泗水昔菑邱訢飲馬斬蛟
眇目於此處也泗水又東南逕魏陽城北城枕泗川
陸機行思賦曰行魏陽之枉渚故無魏陽疑卽泗陽
縣故城也王莽之所謂淮平亭矣蓋魏文帝幸廣陵
所由或因變之未詳也泗水又東逕角城北而東南

流注于淮考諸地說或言泗水于睢陵入淮亦云于
下相入相皆非實錄也

沂水出泰山蓋縣艾山

鄭玄云出沂山亦或云臨樂山水有二源南源所導
世謂之柞泉北水所發俗謂之魚窮泉俱東南流合
成一川右會洛潁水水出洛潁山東北流注之沂水
東南流左合桑潁水水北出桑潁山東流注于沂沂
水又東南螳蜋水入焉水出魯山東南流右注沂沂

水又東逕蓋縣故城南東會連綿之水水發連綿山
南流逕蓋城東而南入沂沂水又東逕浮來之山春
秋經書公及莒人盟于浮來者也即公來山也在邳
鄉西故號曰邳來之間也浮來之水注之其水左控
三川右會甘水而注于沂沂水又南逕爆山西山有
二峯相去一里雙巒齊秀員峙若一沂水又東南逕
東莞縣故城西與小沂水合孟康曰縣故鄆邑今鄆
亭是也漢武帝元朔二年封城陽共王子吉為東莞

侯魏文帝黃初中立為東莞郡東燕錄謂之圍城劉武帝北伐廣固登之以望五龍魏南青州治左氏傳

曰莒魯爭鄆為日久矣今城北鄆亭是也

全氏曰按十三州志

曰有東西二鄆魯昭公所居為西鄆在兗州東平郡莒魯所爭為東鄆此邑是也亦即汝陽之田所謂鄆

離龜陰之田者也

京相璠曰琅琊姑幕縣南四十里員亭故

魯鄆邑世變其字非也郡國志東莞有鄆亭今在圍城東北四十里猶謂之故東莞城矣小沂水出黃狐山西南流逕其城北西南注于沂沂水又南與閭山

東南流右佩二水總歸于沂沂水南逕東安縣故城東而南合時密水水出時密山春秋時莒地左氏傳

莒人歸共仲于魯及密而死是也時密水東流逕東

安城南漢封魯孝王子強為東安侯

一清按漢表強以宣帝甘露四

年封

時密水又東南流入沂沂水又南桑泉水北出五

女山東南流巨圍水注之水出巨圍之山東南注于

桑泉水桑泉水又東南堂阜水入焉其水導源堂阜

春秋莊公九年管仲請囚鮑叔受之及堂阜而稅之

杜預曰東莞蒙陰縣西北有夷吾亭者是也堂阜水
又東南注桑泉水桑泉水又東南逕蒙陰縣故城北
王莽之蒙恩也又東南與冀崗水合水有二源雙會
東導一川俗謂之汶水也

一清按此又一汶非入濟及入淮之水于欽以為齊

有三汶是已

東逕蒙陰縣注桑泉水又東南盧川水注之

全氏曰按漢志太山郡有盧縣即濟北王國都也城陽國有盧縣即是注所云盧川水者也盧為周禮職方兗州浸之一班氏遺之師古則曰盧水在濟北盧縣今考太山之盧縣無盧水而城陽乃有之得毋師古偶誤以城陽為濟北耶又琅瑯郡橫縣亦有盧水入淮然其源流似遜于城陽之盧竊謂師古所指為

城陽無疑也今本漢書城陽之盧作
盧字盧有盧音如昌慮取慮之類

出水鹿嶺山東

南流左則二川臻湊右則諸葛泉源斯奔亂流逕城

陽之盧縣故蓋縣之盧上里也漢武帝元朔二年封

城陽共王子劉稀為侯國

一清按漢表作雷侯狶此
從史表鄭康成破周禮雷

雖為盧維雷盧字通用又本表
以為東海而注中以為城陽

王莽更名之曰著善

矣又東南注于桑泉水桑泉水又東南右合蒙陰水

水出蒙山之陰東北流昔琅瑯承宮避亂此山立性

好仁不與物競人有認其秦者捨之而去其水東北

流入沂沂水又南逕陽都縣故城東縣故陽國也齊
同盟齊利其地而遷之者也漢高帝六年封將軍丁
復為侯國沂水又南與蒙山水合水出蒙山之陰東
流逕陽都縣南東注沂水沂水又左合溫水水上承
溫泉陂而西南入于沂水者也

南過瑯琊臨沂縣東又南過開陽縣東

沂水南逕中丘城西春秋隱公七年夏城中丘左傳
曰書不時也沂水又南逕臨沂縣故城東郡國志曰

琅琊有臨沂縣故屬東海郡有治水注之水出太山
南武陽縣之冠石山地理志曰冠石山治水所出應
劭地理風俗志曰武水出焉蓋水異名也東流逕蒙

山下有祠

一清按漢志泰山郡有蒙陰縣
禹貢之蒙山即在其西南有祠

治水又東

南逕顓臾城北郡國志曰縣有顓臾城季氏將伐之

孔子曰昔者先王以為東蒙主杜稷之臣也何以伐
為冉有曰今夫顓臾固而便近于費者也治水又東
南流逕費縣故城南地理志東海之屬縣也為魯季

孫之邑子路將墮之公山弗擾師襲魯弗克後季氏
為陽虎所執弗擾以費畔即是邑也漢高帝六年封
陳賀為侯國王莽更名之曰順從也許慎說文云沂
水出東海費縣東西入泗從水斤聲呂忱字林亦言
是矣斯水東南所注者沂水在西不得言東南趣也
皆為繆矣故世俗謂此水為小沂水治水又東南逕
枋城南春秋隱公八年鄭伯請釋泰山之祀而祀周
公使宛歸太山之枋而易許曰杜預釋地曰枋鄭祀

秦山之邑也在琅琊費縣東南治水又東南流注于

沂

一清按善長既引漢志以為治水為出南武陽之冠石山矣顧不云入泗而云入沂何也泗水篇有

武水云至下邳入泗而其出不云南武陽之冠石山乃云武原水又南合武水謂之加水已耳此注敘治水于臨沂之下殆因漢志東萊曲成縣出陽邱山之治水云南至沂入海之文而誤也顧宛溪為之說曰加河有二東加入沂西加入泗蓋泗沂交會之處故有此繆今按西加入河出嶧縣之君山即在嶧縣界中與東加入河合遂南入宿遷境今為運道其流甚盛而東加入源出費縣山中或云出榜山蓋即今芙蓉湖其流稍短然則西加入河即漢志冠石山之治水無疑摠與東萊曲成出陽邱山之治水無與也

沂水

又南逕開陽縣故城東縣故鄆國也春秋左傳昭公

十八年邾人襲郕盡俘以歸邾子曰余無歸矣從邾于邾是也後更名開陽矣春秋哀公三年經書季孫斯叔孫仇帥師城啟陽者是矣縣故瑯琊郡治也

又東過襄贛縣東屈從縣西南流又屈南過郯縣西

魯連子稱陸子謂齊湣王曰魯費之衆臣甲舍于襄墳者也王莽更名章信也郯故國也少昊之後春秋

昭公十七年邾子朝魯公與之宴昭子叔孫婼

一清按三

字注問曰少昊烏名官何也邾子曰吾祖也我知之

黃帝炎帝以雲火紀官太皞以龍紀少皞瑞鳳鳥統

歷鳥官之司議政斯在孔子從而學焉既而告人曰

天子失官學在四夷者也竹書紀年晉烈公四年清

按竹書是晉烈公六年越子朱句滅郟子鵠縣故舊

當周威烈王之十二年魯也東海郡治秦始皇以為郟郡漢高帝二年更從

今名全氏曰按郟非秦郡而秦已有東海郡治郟史記陳涉世家云圍東海守慶于郟是也此蓋承

承應劭即王莽之沂平者也之誤

又南過良城縣西又南過下邳縣西南入于泗

春秋左傳曰昭公十三年秋晉侯會吳子于良吳子
辭水道不可以行晉乃還是也地理志曰良城王莽
更名承翰矣沂水於下邳縣北西流分為二水一水
於城北西南入泗一水逕城東屈從縣南亦注泗謂
之小沂水水上有橋徐泗間以為圯昔張子房遇黃
石公于圯上即此處也建安二年曹操圍呂布於此
引沂泗灌城而擒之

洙水出泰山蓋縣臨樂山

地理志曰臨樂山洙水所出西北至蓋入泗水或作

池字蓋字誤也

一清按八字注中注

洙水自山西北逕蓋縣漢

景帝中五年封后兄王信為侯國又西逕泰山東平陽縣春秋宣公八年冬城平陽杜預曰今泰山平陽縣是也河東有平陽故此加東矣晉武帝元康九年改為新泰縣也

西南至卞縣入于泗

洙水西南流盜泉水注之泉出卞城東北卞山之陰

尸子曰孔子至于勝母暮矣而不宿於盜泉渴矣而不飲惡其名也故論撰考識曰水名盜泉仲尼不漱即斯泉矣西北流注于洙水洙水又西南流于市城西而與泗水亂流西南至魯縣東北又分為二水水側有故城兩水之分會也洙水西北流逕孔里北是謂洙泗之間矣春秋之後洙非謂始導矣蓋深廣之耳洙水又西南枝津出焉又南逕瑕丘城東而南入石門門右結石為水門跨於水上也西南流世謂之

杜武溝洙水又西南逕南平陽縣之顯閭亭西邾邑也春秋襄公二十一年經書邾庶其以漆閭丘來奔者也杜預曰平陽北有顯閭亭十三州記曰山陽南平陽縣又有閭丘鄉從征記曰杜謂顯閭丘也今按漆鄉在縣東北漆鄉東北十里見有閭丘鄉顯閭非也然則顯閭自是別亭未知孰是又南洸水注之呂忱曰洸水出東平陽上承汶水於岡縣西閭亭東爾雅曰汶別為閭其由洛之有波矣洸水西南流逕盛

鄉城（西京相璠曰岡縣西南有盛鄉城者也）又南逕

泰山寧陽縣故城（西漢武帝元朔三年封魯共王子

劉恬為侯國

一清按史表恬作恢索隱曰表在濟南今漢表無濟南字地理志泰山郡寧陽

縣曰侯國是也

王莽改之曰寧順也又南洙水枝津注之水

首受洙水西南流逕瑕丘城北又西逕寧陽城南又

西南入于洸水洸水又西南逕泰山郡乘丘縣故城

東趙肅侯二十年韓將舉與齊魏戰於乘丘

一清按史記趙

世家肅侯二十三年韓舉與齊魏戰死于桑丘裴駰集解引地理志云泰山有桑丘縣今魏志是桑丘桑

桑字形相近致訛又韓世家宣惠王八年魏敗我將
韓舉六國年表同韓宣惠王之八年乃周烈王之四
十四年實趙武靈王之元年也去肅侯之二十三年
事隔兩朝年歷三週舉為趙將前已敗死又復為韓
將以與魏戰可怪也是以徐廣曰韓將夫韓將而何
以書于趙世家乎索隱曰舉是韓將而紀年云趙將
蓋舉本趙將後入韓此亦為史遷作調人耳考之紀
年則又不合當周威烈王之十六年正晉烈公之十
年齊田釐與邯鄲韓舉戰于平邑獲韓舉然則舉是
趙將稍可據其時韓武子趙獻侯田齊宣公耳年數
相去八十六年之久舛錯如此索隱又引紀年云
其敗當韓威王八年是不同也而韓又無威王即

此縣也漢武帝元朔五年封中山靖王子劉將夜為

侯國也

一清按史表作桑邱侯索隱曰表在深澤今漢表作桑邱無深澤字蓋桑桑字相似然中

山之封何以在魯宋之郊蓋善長所見之漢書已脫誤矣今直隸安肅縣西南有桑丘城安肅本漢中山國北新城地將夜之封洸水又東南流注于洙洙水宜在彼而此則非也

又南至高平縣南入于泗水西有茅鄉城東去高平

三十里京相璠曰今高平縣西三十里有故茅鄉城

者也

水經注釋卷二十五

欽定四庫全書

史部

水經注釋卷二十六至

詳校官監察御史_臣周元良

刑部郎中_臣許兆椿覆勘

總校官降調編修_臣倉聖脉

校對官編修_臣周興公

謄錄監生_臣夏維翰

欽定四庫全書

水經注釋卷二十六

仁和趙一清撰

沐水 巨洋水 溜水

汶水 維水 膠水

朮水出琅琊東莞縣西北山

大弁山與小泰山連麓而異名也引控衆流積以成川東南流逕邳鄉南南去縣八十許里城有三面而

不周於南故俗謂之半城沐水又東南流左合峴水
水北出大峴山東南流逕郿鄉東東南流注于沐水
也

東南過其縣東

沐水左與箕山之水合水出東諸城西箕山劉澄之
以為許由之所隱也更為巨謬矣其水西南流注于
沐水也

又東南過郿縣東

地理志曰莒子之國盈姓也少昊後列女傳曰齊人

杞梁殖襲莒戰死其妻將赴之道逢齊桓公

朱氏謀
埤箋曰

列女傳作莊公此
云桓公字之謬也

公將弔之杞梁妻曰如殖死有罪

君何辱命焉如殖無罪有先人之弊廬在下妾不敢

與郊弔公旋車弔諸室妻乃哭於城下七日而城崩

故琴操云殖死妻援琴作歌曰樂莫樂兮新相知

悲莫悲兮生別離哀感皇天城為之隳即是城

也其城三重並悉崇峻唯南開一門內城方十二里

郭周四十許里尸子曰莒君好鬼巫而國亡無知之
難小白奔焉樂毅攻齊守嶮全國秦始皇縣之漢興
以為城陽國封朱虛侯章治莒王莽之莒陵也光武

合城陽國為琅琊國以封皇子京雅好宮室窮極伎

巧壁帶飾以金銀明帝時

朱氏謀瑋箋曰後漢書
是章帝此云明帝字誤京

不安莒移治開陽矣沐水又南袁公水東出清山尋
坤維而注沫水又南潯水注之水出於巨公之山
西南流舊堤以溉渚田東西二十里南北十五里潯

水又西南流入沭沭水又南與葛陂水會水發三柱
山西南流逕辟城南世謂之辟陽城史記建元以來
王子侯者年表曰漢武帝元朔二年封城陽共王子
節侯劉壯為侯國也

全氏曰索隱以為屬東海而善長曰城陽此從史表其水

於邑積以為陂謂之辟陽湖西南流注于沭水也

又南過陽都縣東入于沂

沭水自陽都縣又南會武陽溝水水東出倉山山上
有故城世謂之監官城非也即古有利城矣漢武帝

元朔四年封城陽共王子劉釘為侯國也

全氏曰按本表曰東

海而善長以為城陽

其城因山為基水導山下西北流謂之武

陽溝又西至即丘縣注於沐沐水又南逕東海郡即

丘縣故春秋之祝丘也桓公五年經書齊侯鄭伯如

紀城祝丘左傳齊鄭朝紀欲襲之漢立為縣王莽更

之曰就信也郡國志曰自東海分屬琅琊關駟曰即

祝魯之音蓋字承讀變矣沐水又南逕東海厚丘王

莽更之曰祝其亭也分為二瀆西南出今無水世因

謂之枯沐一瀆南逕建陵縣故城東漢景帝八年封

衛綰為侯國

一清按史漢表俱云
景帝六年侯注誤也

王莽更之曰付亭

也沐水又南逕建陵山西魏正光中齊王之鎮徐州
也立大塢遏水西流兩瀆之會置城防之曰曲沐戍
自戍流三十里西注沐水舊瀆謂之新渠自厚丘西
南出左會新渠南入淮陽宿豫注泗水地理志所謂
至下邳注泗者也經言於陽都入沂非矣沐水左瀆
自大堰水斷故瀆東南出桑堰水注之水出襄贛縣

泉流東注沭瀆又南左合橫溝水水發瀆右東入沭
水故瀆又南暨于竭其水西南逕司吾山東又逕司
吾縣故城西春秋左傳楚執鍾吾于以為司吾縣王
莽更之曰息吾也又西南至宿豫注泗水也沭水故
瀆自下堰東南逕司吾城東又東南歷祖口城中祖
水出於楚之祖地春秋襄公十年經書公與晉及諸
侯會吳于祖京相璠曰宋地今彭城偃陽縣西北有
祖水溝去偃陽八十里東南流逕偃陽縣故城東北

地理志曰故偃陽國也

一清按漢志楚國傳陽縣故
偃陽國蓋以傳偃字異故班

固中明之續志亦以為傳陽而劉昭又引左氏
傳及杜預註以實之今注直改傳陽作偃陽也春秋

左傳襄公十年夏四月戊午會于祖晉荀偃士句請伐
偃陽而封宋向戌焉荀瑩曰城小而固勝之不武弗勝
為笑固請丙寅圍之弗克孟氏之臣秦堇父輦重如
役偃陽人啟門諸侯之士門焉縣門發聊人紇扶之
以出門者狄虎彌建大車之輪而蒙之以甲以為櫓
左執之右拔戟以成一隊孟獻子曰詩所謂有力如

虎者也主人縣布堇父登之及堞而絕之墜則又縣之蘓而復上者三主人辭焉乃退帶其斷以徇於軍三日諸侯之師久於偃陽請歸智伯怒曰七日不克爾乎取之以謝罪也荀偃士匄攻之親受矢石遂滅之以偃陽子歸獻于武宮謂之夷俘偃陽嬖姓也漢以為縣漢武帝元朔三年封齊孝王子劉就為侯國王莽更之曰輔陽也郡國志曰偃陽有祖水祖水西南亂于沂而注于沭謂之祖口城得其名矣東南至

朐縣入游注海也

巨洋水出朱虛縣泰山北過其縣西

泰山即東小泰山也巨洋水即國語所謂具水矣秦

宏謂之巨昧王韶之以為巨葭亦或曰朐瀾皆一水

也而廣其目焉

一清按朐瀾之瀾亦作泐元史王磐傳李璫素重磐以禮延致之磐亦樂

青州風土乃買泐河之上題其居曰鹿巷即朐瀾水也

其水北流逕朱虛縣故

城西漢惠帝二年封齊悼惠王子劉章為侯國

一清按史

表章以高地理風俗記曰丹山在西南丹水所出東
后二年封

入海丹水由朱虛丘阜矣故言朱虛城西有長坂遠
峻名為破車峴城東北二十里有丹山世謂之凡山
縣在西南非山也丹凡字相類音從字變也

一清按
丹古篆

作凡故與
凡相似

丹水有二源各導一山世謂之東丹西丹

水自凡山北流逕劇縣故城東東丹水注之水出方
山山有三水一水即東丹水也北逕縣合西丹水而
亂流又東北出逕濟薄澗北濟水亦出方山流入平
壽縣積而為渚水盛則北注東南流屈而東北流逕

平壽縣故城西而北入丹水謂之魚合口丹水又東

北逕望海臺東北注海蓋亦縣所氏者也

一清按漢志北

海郡平望縣侯國續志無之蓋東京省范史和熹鄧后紀有平望侯劉毅章懷注云平望縣屬北海郡今青州北海縣西北平望臺是也一名望海臺注無平望之目而云蓋亦縣所氏可為疎鹵矣亦見此篇注尾

又北過臨朐縣東

巨洋水自朱虛北入臨朐縣熏冶泉水注之水出西谿飛泉側瀨於窮坎之下泉谿之上原麓之側有一

祠目之為治泉祠按廣雅金神謂之清明斯地蓋古
治官所在故水取稱焉水色澄明而清泠特異淵無
潛石淺鏤沙文中有古壇參相對後人微加功飾以
為嬉遊之處南北遽岸凌空疏木交合先公以太和
中作鎮海岱余總角之年侍節東州至若炎夏火流
間居倦想提琴命友嬉娛永日桂筍尋波輕林委浪
琴歌既洽懽情亦暢是焉棲寄實可憑矜小東有一
湖佳饒鮮筍匪直芳齊芍藥實亦潔並飛鱗其水東

北流入巨洋謂之熏冶泉又逕臨朐縣故城東城伯

氏駢邑也漢武帝元朔二年封菑川懿王子劉奴為

侯國

一清按索隱曰表在東海考漢志東海有朐臨朐屬齊郡東萊亦有之然則未知東海是東萊

之誤抑臨朐乃朐縣之訛也

應劭曰臨朐山名也

一清按朐是山名又是水名縣

名臨朐以城臨側之故耳漢志注引應劭曰臨朐山謂臨側朐山也非以臨朐為山之名也善長誤也

故縣氏之朐亦水名其城側川臨朐是以王莽用表

厥稱焉

一清按漢志齊郡臨朐縣莽曰監朐此無監朐之名而云莽表厥稱竊所未喻其城

上下沿水悉是劉武皇北伐廣固營壘所在矣巨洋

水又東北逕委粟山東孤阜秀立形若委粟又東北
洋水注之水西出石膏山西北石澗口東南逕逢山
祠西洋水又東南歷逢山下即石膏山也山麓三成
壁立直上山上有石鼓鳴則年凶郭緣生續述征記曰
逢山在廣固南三十里有祠并石鼓齊地將亂石人
輒打石鼓聲聞數十里洋水歷其陰而東北流世謂
之石溝口然是水下流亦有時通塞及其春夏水泛
川瀾無輟亦或謂之為龍泉水地理志石膏山洋水

所出是也今於此縣唯是瀆當之似符羣證矣洋水
又東北得邳泉口泉源西出平地東流注于巨洋巨
洋水又北會建德水水西發逢山阜而東流入巨洋
水也

又北過劇縣西

巨洋水又東北合康浪水水發縣西南嶼山無事樹
木而員峭孤峙嶠屹分立左思齊都賦曰嶼嶺鎮其
左是也康浪水北流注于巨洋巨洋水又東北逕劇

縣故城西古紀國也春秋莊公四年紀侯不能下齊

以與弟季大去其國達齊難也後改曰劇故魯連子

曰胸劇之人辯者也漢文帝十八年別為菑川國後

并北海

一清按郡國志北海國建武十三年省菑川為高密膠東三國以其縣屬但前漢志菑川有

劇北海亦有之此是菑川之劇非北海之劇也

漢武帝元朔二年封菑川懿

王子劉錯為侯國王莽更之曰俞縣也

一清按漢志菑川有劇自

是王國都不應以封王子班固于此縣下但曰莽曰俞而北海之劇注云侯國疑錯所封在北海善長混

而一之非矣菑川國治之劇在青光縣東南三里亦曰劇南城春秋時紀國地城內有臺俗曰紀臺城者

是北海之劇在昌樂縣西北後漢時此
劇廢省而移北海郡治菑川之劇也 城之北側有

故臺臺西有方池晏謨曰西去齊城九十七里耿弇

破張步於臨淄追至巨昧水上僵尸相屬即是水也

巨洋水又東北逕晉龍驤將軍幽州刺史辟閭渾墓

東而東北流墓側有一墳甚高大時人咸謂之為馬

陵而不知誰之丘壟也巨洋水又東北逕益縣故城

東王莽更之曰滌蕩也
一清按今本漢志作探陽亦誤也范史劉盆子傳有王莽

探湯侯田況章懷注曰王莽 晏謨曰南去齊城五十
改北海益縣曰探湯是也

里司馬宣王伐公孫淵北徙豐人住於此城遂改名
為豐城也又東北積而為潭枝津出焉謂之百尺溝

西北流逕北益都城也漢武帝元朔二年封菑川壺

王子劉胡為侯國

一清按史漢表作益都侯而漢志北海郡有益縣續志樂安國下云

益侯國故屬北海是也魏書地形志齊郡有益都縣

家宇記云魏于壽光縣南十里益都城置益都縣屬

齊郡宋至後魏並屬齊郡也則益都是三國魏所置

治益都城與西漢之益縣微有分別顧景范曰益都

侯邑後并入益縣未知所據矣又青州府壽光縣下

云鉅定城在縣西北八十里漢縣屬齊郡後漢省志

云縣西四十里有益城漢益縣也縣北二十里有益

都城漢武封淄川懿王子胡為侯邑處是知侯邑與

縣治本屬二城益都始為侯邑未立縣之明証也

又西北流而注于巨淀矣

又東北過壽光縣西

巨洋水自巨淀湖東北流逕縣故城西王莽之翼平

亭也漢光武建武二年封更始子鯉為侯國城之西

南水東有孔子石室故廟堂也中有孔子像弟子問

經既無碑誌未詳所立

全氏曰按于欽曰水經之言非也乃是倉頡墓中石室

巨洋水又東北流堯水注之水出劇縣南角崩山即

故義山也俗人以其山角若崩因為角崩山亦名為

角林山皆世俗音譌也水即蕤水矣地理志曰劇縣有義山蕤水所出也北逕嶼山東俗亦名之為青水矣堯水又東北逕東西壽光二城間應劭曰壽光縣有灌亭杜預曰在縣東南斟灌國也又言斟亭在平壽縣東南平壽故城在白狼水西今北海郡治水上承營陵縣之下流東北逕城東西入別畫湖亦曰朕懷湖湖東西二十里南北三十里東北入海斟亭在泚水東水出桑犢亭東覆甌山亭故高密郡治世謂

之故郡城山謂之塔山水曰鹿孟水亦曰戾孟水皆

非也地理志曰桑犢故亭北海之屬縣矣有覆甑山

溉水所出

一清按漢志北海郡桑犢縣覆甑山溉水所出北至都昌之海桑犢本漢縣何云故

亭乎北逕斟亭西北今曰白狼水按地理志北海有斟

縣京相璠曰故斟尋國禹後西北去灌亭九十里溉

水又北逕寒亭西郡國志曰平壽在斟城東

一清按續志云

平壽有斟城不如酈所云

薛瓚漢書集註云按汲郡古文相居斟

灌東郡灌是也明帝以封周後改曰衛斟尋在河南

非平壽也又云太康居斟尋羿亦居之桀又居之尚
書序曰太康失國兄弟五人徙于洛汭此即太康之
居為近洛也余考瓚所據今河南有尋地衛國有觀
土國語曰啟有五觀謂之姦子五觀蓋其名也所處
之邑其名曰觀皇甫謐曰衛地又云夏相徙帝丘依
同姓之諸侯于斟灌斟尋氏即汲冢書云相居斟灌
也既依斟尋明斟尋非一居矣窮后既伏善射篡相
韓浞亦因逢蒙弑羿即其居以生澆因其室而有豷

故春秋襄公四年魏絳曰澆用師滅斟灌及斟尋氏
處澆于過處豷于戈是以五員言于吳子曰過澆殺
斟灌以伐斟尋是也有夏之遺臣曰靡事弔弔之死
也逃于禹氏今禹縣也收斟灌斟尋二國之餘燼殺
韓浞而立少康滅之有窮遂亡也是蓋寓其居而生
其稱宅其業而表其邑縱遺文沿禡亭郭有傳未可
以彼有灌目謂此為非捨此尋名而專彼為是以土
推傳應氏之據亦可按矣

全氏曰按吳仁傑曰原二
斟故國蓋不一處應氏以

為壽光平壽縣按靡奔有馬以收二國餘燼焉在平原與北海近則應說是瓚以爲在河南與洛汭近則瓚說亦是然則其歸奈何曰汲冢書有之大康居斟尋羿亦居之太康失邦而奔斟尋斟尋本在河南羿伐之乃棄國而保平壽所以有二城不然斟尋未滅羿安得而居之相居在東郡之觀而北海亦有灌亭正類是而後又以淳于縣為斟灌國其非一地可知乃必欲以畔觀為斟灌至此依違兩可復不盡非應說亦頗困矣堯水又東北注巨洋伏琛晏謨並言堯嘗頗

駕於此故受名焉非也地理志曰澠水自劇東北至

壽光入海沿其徑趣即是水也

又東北入于海

巨洋水又東北逕望海臺西東北流伏琛晏謨並以
為平望亭在平壽縣故城西北八十里古縣又或言
秦始皇升以望海因曰望海臺未詳也按史記漢武
帝元朔二年封舊川懿王子劉賞為侯國又東北注
于海也

溜水出泰山萊蕪縣原山

溜水出縣西南山下世謂之原泉地理志曰原山溜
水所出故經有原山之論矣淮南子曰水出自飴山

蓋山別名也東北流逕萊蕪谷屈而西北流逕其縣
故城南從征記曰城在萊蕪谷當路岨絕兩山間道
由南北門漢未有范史雲為萊蕪今言萊蕪在齊非
魯所得引舊說云齊靈公滅萊萊民播流此谷邑落
荒蕪故曰萊蕪禹貢所謂萊夷也夷谷之會齊侯使
萊人以兵劫魯侯宣尼稱夷不亂華是也余按太無
萊柞並山名也郡縣取目焉漢高祖置左傳曰與之
無山及萊柞是也

何氏曰氏傳昭公七年辭以無山與之萊柞蓋有無之無非山名全

氏曰按以蕪為無善長殆有聞于
萊蕪之為萊母而不知其非山也應劭十三州記曰

泰山萊蕪縣魯之萊柞邑淄水入西北轉逕城西又
東北流與一水合水出縣東南俗謂之家桑谷水從
征記名曰聖水列仙傳曰鹿皮公者淄川人也少為
府小史才巧舉手成器山岑上有神象人不能到小
史白府君請木工斤斧三十人作轉輪造縣閣意思
橫生數十日梯道成上其巔作祠屋留止其傍其二
間以自固食芝草飲神泉七十餘年淄水來山下呼

宗族得六十餘人命上山半水出盡漂一郡沒者萬計小史辭遣家室令下山著鹿皮衣升閣而去後百餘年下賣藥齊市也其水西北流注淄水淄水又北出山謂之萊蕪口東北流者也

又東北過臨淄縣東

淄水自山東北流逕牛山西又東逕臨淄縣故城南東得天齊水口水出南郊山下謂之天齊淵五泉並出南北三百步廣十步山即牛山也左思齊都賦曰

牛嶺鎮其南者也水在齊八祠中齊之為名起於此
矣地理風俗記曰齊所以為齊者即天齊淵名也其
水北流注于淄水又東逕四豪冢北水南山下有四
冢方基員墳咸高七尺東西直列是田氏四王冢也
淄水又東北逕蕩陰里西水東有冢一基三墳東西
八十步是列士公孫接田開疆古冶子之墳也一清按晏
子作公孫投樂府解晏子惡其勇而無禮投桃以斃
題作田強固野子之死葬陽里即此也一清按陽里亦作陰陽里案宇
記引郡國志云臨淄縣東有陰

陽里是也御覽引此文仍作蕩陰里諸葛亮梁父吟步出齊東門遙望蕩陰里滄浪詩話青州有陰陽里

淄水又北逕其城東城臨淄水故曰臨淄王莽之齊

陵縣也爾雅曰水出其前左為營丘

一清按爾雅云水出其前淄丘

水出其後沮丘水出其右正丘水出其左營丘善長所引疑有誤下同

武王以其地封

太公望賜之以四履都營丘為齊或以為都營陵史

記周成王封師尚父于營丘東就國道宿行遲菜侯

與之爭營丘逆旅之人曰吾聞時難得而易失客寢

安殆非就封者也太公聞之夜衣而行至營丘陵亦

丘也獻公自營丘徙臨淄余按營陵城南無水唯城
北有一水世謂之白狼水西出丹山俗謂凡山也東
北流由爾雅出前左之文不得以為營丘矣營丘者
山名也詩所謂子之營兮遭我乎徂之間兮作者多
以丘陵號同緣陵又去萊差近咸言太公所封考之
春秋經書諸侯城緣陵左傳曰遷杞也毛詩鄭注並
無營字璜以為非近之一清按以營陵為緣陵正是
璜說而道元顧云璜以為非
近之則璜別有說而今亡矣又按漢志齊郡臨淄縣
分註曰師尚父所封應劭曰齊獻公自營丘徙此臣

瓚曰臨淄即營丘也故晏子曰始與鳩氏居之逢伯陵居之太公居之又曰先君太公築營之丘今齊之城中有丘即營丘也師古曰瓚說是也又北海郡營陵縣分註曰或曰營丘應劭曰師尚父封于營丘陵亦丘也臣瓚曰營丘即臨淄也營陵春秋謂之緣陵師古曰臨淄營陵皆舊營丘地余謂獻公徙薄姑都治臨淄見于史記齊世家應說遂啟後人之疑且淄水又不逕營陵臣瓚云臨淄即營丘誠誤祇緣孟堅以臨淄即太公始封師古論附班氏而以瓚說為是不知瓚上句證臨淄之為營丘下句實營陵之即緣陵言各有當臨淄營陵皆舊營丘地一語滑突了之然太公始封宜在北海史記云營丘邊萊故萊人與之爭國寰宇記濰州昌樂縣有古營丘城云本夏商已前故國太公所封之處明其不在臨淄也迨獻公新造斯邑猶取故稱故臨淄亦有營丘之號而春秋之先祀自雍丘僻處東夷魯僖十五年桓公城緣陵

而遷之棄地閒旧市思隣國以收救患分災之美霸
者所為大率類是故營陵又有緣陵之目遂為淳于
公之都邑矣不然東樓之裔既非強大焉能與決決
表海之邦爭此逼處之土乎且瓚所引晏子對景公
之語本在薄姑而移之臨淄故知所傳之妄若夫晏
子之對亦見韓詩外傳景公游牛山而泣下晏子曰
古無死者則太公丁公至今猶存吾君方將披萊豆
而立畎畝何暇念死乎又寧可以是以作太公封臨淄
之據哉又困學紀聞云齊世家胡公始徙都薄姑周
夷王之時獻公因徙薄姑都治臨淄時正義曰詩蒸
民云仲山甫徂齊傳曰古者諸侯逼隘則王者遷其
邑而定其居蓋去薄姑遷于臨淄以為宣王之時始
遷臨淄與世家異毛公在遷之前其言當有據此證
尤為精確顧祖禹曰呂氏春秋太公封營丘之渚海
阻山高險固之地其後五世胡公徙薄姑六世獻公
徙臨淄蓋自東而西也又云顧氏曰班志云臨淄名

營丘此猶晉遷于新田而仍謂之絳楚遷于郢而仍謂之郢蓋因臨淄城中有小丘而繫以舊名非即古營丘也晉載記慕容德如齊登營丘即此地杜氏又謂臨淄後為營陵夫漢志明言齊郡治臨淄北海郡治營陵豈一城乎此顧氏謂野王杜氏則杜佑也君卿此語原非大繆祇因應劭有云陵亦丘也故以營丘為營陵不知營丘之號可襲而漢縣之目不可移也若改作臨淄後稱營丘則善矣 今臨淄

城中有丘在小城內周迴三百步高九丈北降丈五溜水出其前故有營丘之名與爾雅相符城對天齊淵故城有齊城之稱是以晏子言始夷鳩氏居之逢伯陵居之太公居之又曰先君太公築營之丘

一清按師

古曰築營之丘言季札觀風聞齊音曰泱泱乎大風于營丘地築城邑

也哉表東海者其太公乎田巴入齊過淄自鏡郭景

純言齊之營丘淄水逕其南及東也非營陵明矣獻

公之徙其猶晉氏深翼名絳非謂自營陵而之也

氏全

曰孔穎達曰臨淄營邱是一地謂自營丘徙臨淄者應劭之繆當云自薄姑徙臨淄一清按史記齊世家

云哀公同母弟山怨胡公與其黨率營丘人襲殺胡公而自立是為獻公因徙薄姑都治臨菑即臣瓚所

謂博昌有薄姑城者也濟水注云薄姑去齊城六十里漢志又云琅瑯姑幕或曰薄姑闕以為成王封太

公非也蓋周公滅奄之後其外郭即獻公所徙臨淄以薄姑地益太公之封耳

城也世謂之虜城言齊湣王伐燕燕王噲死虜其民
寶居郭因以名之秦始皇三十四年滅齊為郡治臨
淄漢高帝六年封子肥於齊為王國王莽更名濟南
也戰國策田單為齊相過淄水有老人涉淄而出不
能行坐沙中單乃解裘於斯水之上也

又東過利縣東

淄水自縣東北流逕東安平城北

禹貢錐指曰應劭
曰博昌縣西南三

十里有安平亭故縣也按淄水自利縣東又東北流
不得過博昌之西南今臨淄縣東又安平故城若以

為是則當先安平後利縣豈注文偶爾失次耶不然則道元誤引利縣東北當別有東安平城也一清按漢志留川國東安平縣師古注引闕駟曰博陵有安平故此加東然則非博昌也所引應劭語見濟水注安平又是平安之誤博陵後漢質帝置方輿紀要安平城在臨淄縣東十七里本齊邑史記齊世家平公割齊安平以東為田氏封邑湣王末燕師入齊田單走安平既而齊襄王封田單為安平君漢置本安平縣屬菑川國後漢改屬北海國安平平安本是二邑皆在利縣西南東安平為淄水所逕平安為濟水所逕不可混也此文自縣東北流蒙上臨淄而言故以東安平次于其下觀後別出時水東北逕齊利縣故城北之語可知原無又東逕巨淀縣故城南征和四

年漢武帝幸東萊臨大海三月耕巨定即此也縣東

南則巨淀湖蓋以水受名也溜水又東北逕廣饒縣

故城南漢武帝元鼎中封菑川靖王子劉國為侯國

一清按王子侯表是元鼎元年封

溜水又東北馬車瀆水注之首受

巨淀淀即濁水所注也呂忱曰濁水一名溷水出廣

縣為山世謂之冶嶺山東北流逕廣固城西城在廣

縣西北四里四周絕澗岨水深隍晉永嘉中東萊人

曹嶷所造也水側山際有五龍口義熙五年劉武帝

伐慕容超于廣固也以藉嶮難攻兵力勞弊河間人

元文說裕云昔趙攻曹嶷望氣者以為繩水帶城非
可攻拔若塞五龍口城當必陷石虎從之嶷請降降
後五日大雨雷電震開後慕容恪之攻段龕十旬不
拔塞口而龕降降後無幾又震開之舊基猶存宜試
修築裕塞之趣及城內男女皆悉脚弱病者大半超
遂出奔為晉所擒也然城之所跨實憑地險其水可
固城者在此濁水東北流逕堯山東從征記曰廣固
城北三十有堯山祠堯因巡狩登此山後人遂以名

山廟在山之左麓廟像東面華宇修整帝圖嚴飾軒
冕之容穆然山之上頂舊有上祠今也毀廢無復遺
式磐石上尚有人馬之跡徒黃石而已唯刀劍之蹤
逼真矣至于燕鋒代鐔魏缺齊鉞與今劍莫殊以蜜
模寫知人功所制矣西望胡公陵孫暢之所云青州
刺史傅宏仁言得銅棺隸書處濁水又東北流逕東
陽城北東北流合長沙水水出逢山北阜世謂之陽
水也東北流逕廣縣故城西舊青州刺史治亦曰青

州城陽水又東北流石井水注之水出南山山頂洞
開望若門焉俗謂是山為劈頭山其水北流注井井
際廣城東側三面積石高深一匹有餘長津激浪瀑
布而下彭蠡之音驚川聒谷崩湊之勢狀同洪河北
流入陽水余生長東齊極遊其下於中闊絕乃積綿
載後因王事復出海岱郭金紫惠同石井賦詩言意
彌日嬉娛尤慰驕心但恨此水時有通塞耳陽水東
逕故七級寺禪房南水北則長廡徧駕迴閣承阿林

之際則繩坐疏班錫鉢間設所謂修修釋子眇眇禪
棲者也陽水又東逕東陽城東南義熙中晉青州刺
史羊穆之築此以在陽水之陽即謂之東陽城世以
濁水為西陽水故也水流亦有時窮通信為靈矣昔
在宋世是水絕而復流劉晃賦通津焉魏大和中此
水復竭輟流積年先公除州即任未暮是水復通澄
映盈川所謂幽谷枯而更溢窮泉輟而復流矣海岱
之士又頌通津焉平昌龍民孫道相頌曰唯彼繩泉

竭踰三齡祈盡珪璧謁窮斯牲道從隆替降由聖明
耆民河間趙嶷頌云敷化未暮元澤潛施枯源揚瀾
涸川滌陂北海郭欽曰先政輟津我后通洋但頌廣
文煩難以具載陽水又北屈逕漢陽景王劉章廟東
東注于巨洋後人竭斷令北注濁水時人通謂濁水
為陽水故有南陽北陽水之論二水渾流世謂之為
長沙水也亦或通名之為繩水故晏謨伏琛為齊記
並云東陽城既在繩水之陽宜為繩陽城非也世又

謂陽水為洋水余按羣書盛言洋水出臨朐縣而陽

水導源廣縣兩縣雖隣川土不同於是疑焉

于氏欽齊乘云

曾肇南洋橋記曰俗呼洋水有二曰南洋河今橋所
在是也曰北洋河距城北二里者是也北洋傳記無
大今出九田山入淄水齊記謂之鮑水道元則曰羣
書盛言洋水臨朐陽水道源廣縣兩縣雖隣川土不
同於是疑焉然則洋分南北當後魏時已不能知況
後世哉今辨之曰羣書盛言出臨朐者此巨洋也漢
志失其源委耳南陽自為長沙水北陽自為濁水導
源廣縣者是也曾氏乃因漢志石膏山之洋水而以
陽為洋誤矣長沙水出其西石溝水出其東洋水自
出臨朐沂山漢志讀如祥與蜀之洋州同音故水經
稱洋水則有巨洋北洋稱陽水則有南陽北陽四濁
水雖以音同致疑源流可考惜乎曾氏之不察也濁

水又北逕臧氏臺西又北逕益城西又北流注巨淀
地理志曰廣縣為山濁水所出東北至廣饒入巨淀
巨淀之右又有女水注之水出東安平縣之菟頭山
從征記曰水西有桓公冢甚高大墓方七十餘丈高
四大員墳圍二十餘丈高七丈餘一墓方七丈二墳
晏謨曰依陵記非葬禮如承世故與其母同墓而異
墳伏琛所不詳也冢東山下女水原有桓公祠侍其
衡奏魏武王所立曰近日路次齊郊瞻望桓公墳壟

在南山之阿請為立祠為塊然之主郭緣生述征記
曰齊桓公冢在齊城南二十里因山為墳大冢東有
女水或云齊桓公女冢在其上故以名水也女水導
川東北流甚有神焉化隆則水生政薄則津竭燕建
平六年水忽暴竭元明惡之寢病而亡燕太上四年
女水又竭慕容超惡之燕祚遂淪女水東北流逕東
安平縣故城南續述征記曰女水至安平城南伏流
一十五里然後更流注北陽水城故鄣亭也春秋魯

莊公三年紀季以鄒入齊公羊傳曰季者何紀侯弟也賢其服罪請鄒以奉五祀田成子單之故邑也後以為縣博陵有安平故此加東也世祖建武七年封

菑川王子劉茂為侯國

一清按范史宗室四王傳泗水王欽欽之子曰菑川王終

欽從父弟曰中山王茂建武十三年宗室諸王降爵茂封穰侯是茂于菑川王為從父亦不封東安平也然光武紀又云以茂為單父侯道元載之泗水注中紀傳互異未知所是又遷東安平城

東東北逕壟丘東東北入巨淀地理志曰菟頭山女水所出東北至臨淄入巨淀又北為馬車瀆北合淄

水又北時繩之水注之時水出齊城西北二十五里平地出泉即如水也亦謂之源水因水色黑俗又目之為黑水西北逕黃山東又北歷愚山山東有愚公冢時水又屈而逕杜山北有愚公谷齊桓公時公隱于谿鄰有認其駒者公以與之山即杜山之通阜以其人狀愚故謂之愚公山水有石梁亦謂之石梁水又有澧水注之水出時水東去臨淄城十八里所謂澧中也俗以澧水為宿留水西北入于時水孟子去

齊三宿而後出畫故世以此而變水名也

一清按史記惠景問

侯者年表畫清侯朝鮮尼谿相索隱曰畫音獲水名在齊又音乎卦反後漢書耿弇傳云進軍畫中章懷注云畫中邑名畫音胡麥反故城在今西安城東有畫水故名或作畫則字形之似也蓋以孟子三宿于此後人因以宿留目之方俗之音隨之而變酈道元遊歷三齊熟其風土故云俗以畫水為宿留水蓋宿留反語宜為畫字朱子集註曰或云畫當作畫字也其後悉改而從畫王應麟困學紀聞引水經注云畫水出時水及黃慎中刊本俱是畫字失古義矣乃毛奇齡作經問必欲強分畫畫為二邑云畫邑在臨淄西南為孟子所宿之處畫邑在臨淄西北三十里燕封王歇之地以燕從西北至齊當是畫邑孟子從西南至滕當是畫邑妄生穿鑿故不若酈注之為當也水南山西有王歇墓昔樂

毅伐齊賢而封之歟不受自縊而死水側有田引水
溉跡尚存時水又西北逕西安縣故城南本渠卽地
齊大夫雖廩之邑矣王莽更之曰東寧時水又西至
石洋堰分為二水謂之石洋口枝津西北至梁鄒入
濟時水又北逕西安城西又北京水系水注之水出
齊城西南世謂之寒泉也東北流直申門西京相璠
杜預並言中門卽齊城南面第一門矣為申池昔齊
懿公遊中池邴戎庸職

朱氏謀璋箋云左
傳作邴歌閭職

二人害公

於竹中今池無復髣髴然水側尚有小小竹木以時
遺生也左思齊都賦注申池在海濱齊數也余按春
秋襄公十八年晉伐齊戊戌伐雍門之荻己亥焚雍
門壬寅焚東北二郭甲辰東侵及沂而不言北掠于
海且晉獻子尚不辭死以逞志何容對仇敵而不徵
暴草木于海隅乎又炎夏火流非遠遊之辰懿公見
弑蓋是白龍魚鼈見困近郊矣左氏捨近遺遠考古
非議杜預泛言有推據耳系水傍城北流逕陽門西

水次有故封處所謂齊之稷下也當戰國之時以齊宣王喜文學遊說之士鄒衍淳于髡田駢接子慎到之徒七十六人皆賜列第為上大夫不治而論議是以齊稷下學士履盛且數百十人劉向別錄以稷為齊城門名也談說之士期會于稷門下故曰稷下也鄭志曰張逸問書贊云我先師棘下生何時人鄭元答云齊田氏時善學者所會處也齊人號之棘下生無常人也余按左傳昭公二十二年莒子如齊盟于

稷門之外漢以叔孫通為博士號稷嗣君史記音義
曰欲以繼蹤齊稷下之風矣然棘下又是魯城內地
名左傳定公八年陽虎劫公伐孟氏入自上東門戰
於南門之內又戰于棘下者也蓋亦儒者之所萃焉
故張逸疑而發問鄭元釋而辨之雖異名兩見大歸
一也

一清按寰宇記棘下齊城內地名
稷棘聲相近不得引魯地以釋齊城內有故臺

有營邱有故景王祠即朱虛侯章廟矣晉起居注云
齊有大蛇長三百步負小蛇長百餘步逕於市中市

人悉觀自北門所入處也北門外東北二百步有齊相晏嬰冢宅左傳晏子之宅近市景公欲易之而嬰弗更為誡曰吾生則近市死豈易志乃葬故宅後人名之曰清節里系水又北逕臨淄城西門北而西流逕梧宮南昔楚使聘齊齊王饗之梧宮即是宮矣其地猶名梧臺里臺甚層秀東西一百餘步南北如減即古梧宮之臺臺東即闕子所謂宋愚人得燕石處臺西有石社碑碑猶存漢靈帝熹平五年立其題云

梧臺里系水又西逕葵丘北春秋莊公八年襄公使連稱管至父戍葵丘京相璠曰齊西五十里有葵丘

地若是無戍之

一請按下有脫字

僖公九年齊桓會諸侯于

葵丘宰孔曰齊侯不務德而勤遠畧明葵丘不在齊也引胡廣汾陰葵丘山陽西北葵城宜在此非也余原左傳連稱管至父之戍葵丘以瓜時為往還之期請代弗許將為齊亂故令無寵之妹侯公於宮因無知之絀遂害襄公若出遠無代寧得謀及婦人而為

公室之亂乎是以杜預稽春秋之旨即傳安之注于
臨淄西不得捨近託遠苟成已異於異可殊即義為
負然則葵丘之戌即此地也系水西左迤為潭又西
逕高陽僑郡南魏所立也又西北流注于時時水又
東北流繩水注之水出營城東世謂之漢漆水也西
北流逕營城北漢景帝四年封齊悼惠王子劉信都
為侯國

一清按王子侯表
是文帝四年封

繩水又西逕樂安博昌縣

故城南應劭曰昌水出東萊昌陽縣道遠不至取其

嘉名

一清按漢志注引應劭曰昌水出東萊昌陽臣瓚曰從東萊至博昌經歷宿水不得至也取其

嘉名耳師古曰瓚說是今注云云殆合二人之說為一人而昌陽之昌水水經失去東萊一郡之水故無

可考 闕駟曰縣處勢平故曰博昌繩水西歷貝丘京

相璫曰博昌縣南近繩水有地名貝丘在齊城西北

四十里春秋莊公八年齊侯田于貝丘見公于彭生

豕立而泣齊侯墜車傷足於是處也繩水又西北入

時水從征記又曰水出臨淄縣北逕樂安博昌南界

西入時水者也自下通謂之為繩也昔晉侯與齊侯

宴齊侯曰有酒如繩指喻此水也時水又屈而東北

逕博昌城北

一清按漢志千乘郡博昌時水北至巨定入馬車漬俗本作縣字誤也

時

水又東北逕齊利縣故城北又東北逕巨淀縣故城

北又東北逕廣饒縣故城北東北入淄水地理風俗

志曰淄入濡

全氏曰先司空公曰東州無濡水古文濡如通漢志如溪水經作濡溪是也然

則所云濡即耐水一名如故也然濡水淮南子曰白

支流通濟則由如以達濟非其經流也公問微言曰若以水投水如何孔子曰淄繩之水合

易牙嘗而知之謂斯水矣

又東北入于海

淄水入馬車瀆亂流東北逕琅槐故城南又東北逕馬井城北與時繩之水互受通稱故邑流其號又東北至皮丘坭入于海故晏謨伏琛並言淄繩之水合于皮丘坭西地理志曰馬車瀆至琅槐入于海也蓋

舉縣言也

齊乘云按通志畧曰杜預謂淄入汶班固謂淄入濟桑欽謂淄入海考其形勢當以

杜為正豈其然乎諸說惟桑氏為有據宜其以水名家也蔣氏廷錫尚書地理今釋曰禹時淄水入海不入濟水經注敘述甚明史記河渠書亦云禹治水之後于齊通淄之間是二水不通可知蔡氏因漢書

溜水入濟一語云溜水東入濟非是王氏士禎居易錄云鄭夾深闢人于西北地理水道多不能詳即就予鄉之水考之溜水杜云出泰山梁父縣西入汶班云出萊蕪原山東至博昌入濟桑欽云出萊蕪原山東北入海漁仲云考其形勢當以杜言為正按溜水出益都縣顏神鎮東南岳陽山東麓即原山也北逕馬陵俗名長谷道東北逕牛山折而北漸臨淄城東又東北逕安平故城北又東北逕樂安城東又北至馬車瀆合時水入海今溜水流經臨淄城南十里沙石迅急東北至樂安境與時水同入海與汶判若秦越安得有西入汶之理以此推之通志之外訛多矣一清按溜水入海于氏主水經最合禹迹蔡氏主班猶未為失鄭氏主杜則誤矣然杜元凱所言別一溜水原非禹貢之溜也夾深不知而妄主之王氏不察而強辨之班云入濟即應劭所云入濡也是支流非正派地理志于泰山萊蕪之溜水千乘博昌之時水

皆云幽州浸青之北境即幽之南境盖本于職方也
合之叙河經及濟水注引伏琛齊記與本篇注湍時
二水原有相通之道而以入海
為歸漢志水經本無異同也

汶水出朱虛縣泰山

一清按沂山在青州府臨朐縣南
百二十五里周禮職方青州其山

鎮曰沂山一名東泰山史記封禪書公玉帶言黃帝封
東泰山禪凡山天子既今設祠具至東泰山山卑小不
稱其費乃令禮官祠之而不封禪隋開皇十四年詔以
沂山為東鎮後代因之載在祀典志云山西宗岱嶽東
俯琅瑯背負鳳皇皇嶺東接摺陵關其嶺為百丈崖壁立
萬仞形如斧削有飛泉下灑曰瀑布泉瀾水出其西麓
水經巨洋水出朱虛縣泰山鄭注云泰山即東小泰山
也沂水亦出其西水經沂水出泰山盖縣外山鄭注云
鄭元云出沂山亦或云臨樂山是也沭水出其東水經
沭水出琅瑯東莞縣西北山鄭注云大弁山與小泰山

連麓而異名是也而入濰之汶亦出其上蓋齊東境內之水大半出于昶是表青州之鎮也宜哉

山上有長城西接岱山東連瑯琊巨海千有餘里蓋田氏之所造也竹書記年梁惠成王二十年齊築防以為長城竹書又云晉烈公十二年王命韓景子趙烈子及我師伐齊入長城史記所謂齊威王曰趙侵我伐長城者也伏琛晏謨並言水出縣東南崕山在小泰山東者也

北過其縣東

汶水自縣東北逕郃城北地理風俗記曰朱虛縣東
四十里有郃城亭故縣也又東北逕管寧冢東故晏
謨言柴阜西南有魏獨行君子管寧墓墓前有碑又
東北逕柴阜山北山之東有徵士郇原冢碑誌存焉
汶水又東北逕漢青州刺史孫嵩墓西有碑碣汶水
又東逕安丘縣故城北漢高帝八年封將軍張敖為
侯國地理志曰王莽之誅郅也孟康曰今渠丘亭莒
渠丘城是也伏琛晏謨齊記並言亭在渠丘城東北

十里非也城對牟山之西南有孫賓碩兄弟墓碑

誌並在也

又北過淳于縣西又東北入于濰

故夏后氏之斟灌國也周武王以封淳于公號曰淳

于國春秋桓公六年冬州公如曹傳曰淳于公如曹

度其國危遂不復也其城東北則兩川交會也

一清按漢

志琅邪郡朱虛縣東泰山汶水所出東至安邱入濰師古曰前言汶水出萊蕪入濟今此又言出朱虛入濰將桑欽所說有異或者有二汶水乎曾彥和曰汶水有二出萊蕪縣原山入濟者徐州之汶也出朱虛

縣泰山入濰者青州之汶也于欽曰按入濟之汶見禹貢論語謂之汶上書傳謂之北汶即今大清河入濰之汶見漢書入沂之汶見水經齊有三汶清河為大胡渭曰元和志乾封縣界有五文源別而流同五汶者曰北汶嬴汶柴汶年汶其一則經流也酈注無嬴汶嬴汶流合年汶故不言五汶入有水出萊蕪縣塞子村流合年汶者近志指為浯汶據漢志琅邪靈門縣有高桑山浯水所出東北入濰說文云水出靈門山世謂之浯汶在今莒州界與萊蕪無涉東汶出朱虛縣小泰山北流至淳于縣入濰在今臨朐安邱界淮南子曰汶出弗其西流入濟高誘云弗其山名在朱虛縣東是即入濰之東汶言入濟者淮南之誤也

濰水出琅邪箕縣濰山

日知錄曰濰水出琅邪箕屋山尚書禹貢濰淄其道左傳襄公

十八年晉師東侵及淮是也其字或省水作維或省系
作淮又或从心作惟總是一字漢書地理志瑯琊郡朱
虛下箕下作維靈門下橫下析泉下作淮上文引禹貢
維留其道又作惟一卷之中異文三見古人之文或省
或借其旁並从鳥隹之隹則一爾後人誤讀
為淮沂其入之淮而呼此水為槐河失之矣

瑯琊山名也越王句踐之故國也句踐并吳欲霸中
國徙都瑯琊秦始皇二十六年滅齊以為郡城即秦
皇之所築也遂登瑯琊大樂之山作層臺於其上謂
之瑯琊臺臺在城東南十里孤立特顯出于衆山上
下周二十里餘傍濱巨海秦皇樂之因留三月乃徙

黔首三萬戶於瑯琊山下復十二年所作臺基二層
層高三丈上級平敞方二百餘步廣五里刊石立碑
紀秦功德臺上有神淵淵至靈焉人汙之則竭齊潔
則通神廟在齊八祠中漢武帝亦嘗登之漢高帝呂
后七年以為王國文帝三年更名為郡全氏曰于丈
當作漢高后
七年以封營陵侯呂澤為王
國文帝元年更為郡方合 王莽改曰填夷矣
濰水
導源濰山許慎吕忱云濰水出箕屋山淮南子曰濰
水出覆舟山蓋廣異名也東北逕箕縣故城西又西

析泉水注之水出析泉縣北松山東南流逕析泉縣

東又東南逕仲固山東北流入于濰地理志曰至箕

縣北入濰者也

一清按漢志瑯琊郡析泉縣析泉水北至箕入淮淮即濰濰出箕縣濰山

箕字是箕字之誤寰宇記引漢志亦作箕云舊地理書並失其所在蓋今莒縣東北分流山之北又云漢志注云夜頭水經裨南至海輿地志云向水南至海夜頭向水蓋異名也地理書皆失其所在今莒縣南七十里故向城春秋時向邑即裨縣也裨今本漢書作裨說文作裨應劭曰音裨與析泉境相屬樂史所記足補鄭

注之遺濰水又東北逕諸縣故城西春秋文公十

二年季孫行父城諸及郛傳曰城其下邑也王莽更

名諸井矣澠水又東北涓水注之水出馬耳山山高百丈上有二石並舉望齊馬耳故世取名焉東去常山三十里涓水發于其陰北逕婁鄉城東春秋昭公五年經書夏莒牟夷以牟婁防茲來奔者也又分諸縣之東為海曲縣故俗人謂此城為東諸城涓水又北注于澠水

東北過東武縣西

縣因岡為城城周三十里漢高帝六年封郭蒙為侯

國王莽更之曰祥善矣又北左合扶淇之水水出西
南常山東北流注濰晏謨伏環並以濰水為扶淇之
水以扶淇之水為濰水非也按經脈志濰自箕縣北
逕東武縣西北流合扶淇之水晏謨伏環云東武城
西北二里濰水者即扶淇之水也濰水又北右合盧
水即久台水也地理志曰水出琅琊橫縣故山

一清按漢

志琅琊橫縣下云故山久台水所出東南至東武入
淮師古曰台音怡所謂橫故山者山本名橫山縣因
山以受氏亦曰橫耳道元依班志以立文乃曰橫縣
故山可謂疏鹵矣顧景范曰久當作名漢書誤本後

人承其繆又曰盧水源出盧山北流入澠一名台水
近志訛為久台水又曰盧山在諸城縣東南四十五
里以秦博士盧敖隱處而名其北即廢橫縣也盧水
源出于此按周禮職方兗州其浸盧維班固僅志禹
貢維水而盧水無聞師古以為在濟北盧縣而泰山
之盧入無盧水也故老友全謝山欲以城陽慮縣之
盧川水當之竊謂不如用此琅邪之台水木出盧山
曰盧水東南至東武入澠見于地理志以此當職方
之浸庶為可據也 王莽之令丘也山在東武縣故城東南世

謂之盧山也西北流逕昌縣故城西東北流齊地記
曰東武城東南有盧水水側有勝火木方俗音曰櫟
子其木經野火燒死炭不滅故東方朔云不灰之木

者也其水又東北流逕東武縣故城東而西北入澠
地理志久台水出東南逕東武入澠者也尚書所謂
澠溜其道矣

又北過平昌縣東

澠水又北逕石泉縣故城西王莽之養信也地理風
俗記曰平昌縣東南四十里有石泉亭故縣也澠水
又北逕平昌縣故城東荆水注之水出縣南荆山阜
東北流逕平昌縣故城東漢文帝封齊悼惠王肥子

劉永為侯國

一清按永史漢表俱作邛是也即後為膠西王者也又索隱曰平原而善長以

為瑯琊地理志平原瑯琊俱有平昌縣平原之平昌下云侯國而瑯琊之平昌則無說續志北海國平昌下云侯國故屬瑯琊然則小司馬非矣城之東南角有臺臺下有井與

荆水通物墜於井則取之荆水昔常有龍出入于其

中故世亦謂之龍臺城也荆水又東北流注于濰水

又北浯水注之水出崕山世謂之巨平山也地理志

曰靈門縣有高原山與崕一山浯水所出東北入濰

一清按漢志瑯琊郡靈門縣高原山壺山浯水所出東北入淮師古曰原即拓字今是山西

接嵒山許慎說文言水出靈門山

一清按說大浯水出瑯琊靈門壺山

山疑脫壺字

世謂之浯汶矣其水東北逕姑幕縣故城東

縣有五色土王者封建諸隨方受之故薄姑之國也

闕駟曰周成王時薄姑與四國作亂周公滅之以封

太公是以地理志曰或言薄姑也王莽曰季睦矣應

劬曰左傳曰薄姑氏國太公封焉薛瓚漢書注云博

昌有薄姑城未知孰是浯水又東北逕平昌縣故城

古竭此水以溢溉田南注荆水浯水又東北流而注

于澠水也

又北過高密縣西

應劭曰縣有密水故有高密之名也然今世所謂百尺水者蓋密水也水有二源西源出弁山亦曰障曰山山勢高峻隔絕陽曦即此山也晏謨曰山狀障日也其水東北流東源出五弩山西北流同瀉一壑俗謂之百尺水古人竭以溉田數十頃北流逕高密縣西下注澠水自下亦兼通稱焉亂流歷縣西碑產山

西又東北水有故堰舊鑿石堅柱斷濰水廣六十許步掘東岸激通長渠東北逕高密縣故城南明帝永平中封鄧震為侯國縣南十里蓄以為塘方二十餘里古所謂高密之南都也溉田一頃許陂水散流下注夷安澤濰水自堰北逕高密縣故城西漢文帝十六年別為膠西國宣平本始元年更為高密國王莽之章年也

一清按漢志王莽改高密國之高密縣為章年而國下無說

濰水又北

昔韓信與楚將龍且夾濰水而陣于此信夜令為萬

餘囊盛沙以遏澰水引軍擊且偽退且追北信決水
水大至且軍半不得渡遂斬龍且於是水水西有礪
阜阜上有漢司農鄉鄭康成冢石碑猶存又北逕昌
安縣故城東漢明帝永平中封鄧襲為侯國也郡國
志曰漢安帝延光元年復也

又北過淳于縣東

澰水又北左會汶水北逕平城亭西又東北逕密鄉
亭西郡國志曰淳于縣有密鄉地理志皆北海之屬

縣也應劭曰淳于縣東北六十里有平城亭又四十里有密鄉亭故縣也濰水又東北逕下密縣故城西城東有密阜地理志曰有三戶祠余按應劭曰密者水名是有下密之稱俗以名阜非也

又東北過都昌縣東

濰水東北逕逢萌墓萌縣人也少有大節恥給事縣亭遂浮海至遼東復還在不其山隱學明帝安車徵萌以佯狂免又北逕都昌縣故城東漢高帝六年封

朱軫為侯國北海相孔融為黃巾賊管亥所圍於都昌也太史慈為融求救劉備持的突圍其處也

又東北入于海

膠水出黔陬縣膠山北過其縣西

齊記曰膠水出五弩山蓋膠山之殊名也北逕祝茲

縣故城東漢武帝元鼎中封膠東康王子延年為侯

國一清按索隱曰案志松茲在廬江亦作祝茲表在卿邳地理志邳邳無祝茲縣然小司馬欲以廬江

之域當膠東之封非矣漢表是元封此云元鼎道元誤記也又逕邾縣故城西地

理志瑯琊之屬縣也漢文帝元年封呂平為侯國

清一

按史記高后紀及惠景間侯者年表呂平以高后元年封扶柳侯非文帝索隱曰縣名屬信都亦非瑯琊却縣也又平為高后婢長姁子而亦冒姓呂氏者也膠水又北逕黔陬縣故城

西泰山松郡國志曰縣又介亭地理志曰故介國也

春秋僖公二十九年介葛盧來朝聞牛鳴曰是生三

犧皆用之問之果然晏謨伏琛並云縣有東西二城

相去四十里有膠非水也斯乃柜艾水也水出縣西

南柜艾山即齊記所謂黔父山也東北流逕柜縣故

城西王莽之後同也世謂之王城又謂水為洋洋水

矣

顧氏祖禹曰蕪林以為根艾水即膠之洋河

又東逕晏伏所謂西黔陬

城西又東入海地理志曰琅邪有柜縣柜艾水出焉

一清按今本漢志作根艾水

東入海即斯水也膠水北逕晏伏所

謂西黔陬城東今高密郡側有黔陬縣地理志曰膠水出邦縣王莽更之純德矣疑即是縣所未詳也

又北過夷安縣東

縣故王莽更名之原亭也應劭曰故萊夷維邑也太

史公曰晏平仲萊之夷維之人也漢明帝永平中封
鄧珍為侯國西去濰水四十里膠水又北逕膠陽縣
東晏伏並謂之東亭自亭結路南通夷安地理風俗
記曰淳于縣東南五十里有膠陽亭故縣也又東北
流左會一水世謂之張奴水水發夷安縣東南阜下
西北流歷膠陽縣注于膠水之左東北為澤水渚百
許里謂之夷安潭潭之澤周四十里亦濰水枝津之
所注也膠水又東北逕下密縣故城東又東北逕膠

東縣故城西漢高帝元年別為國

全氏曰按此實項王事也蓋分三齊

而以故王曰市國于膠東

景帝封子寄為王國王莽更之郁秩也

今長廣郡治伏琛晏謨言膠水東北迴達于膠東城北百里流注于海

又北過當利縣西北入于海

縣故王莽更名之東萊亭也又北逕平度縣漢武帝

元朔二年封菑川懿王子劉衍為侯國

一清按漢表作行此從史

表王莽更名之曰利盧也縣有土山膠水北歷土山

注于海海南土山以北悉鹽坵相承修煮不輟北眺
巨海杳冥無極天際兩分白黑方別所謂溟海者也

故地理志曰膠水北至平度入海者也

一清按周禮職方九藪具載水

經而獨缺膠養漢時瑯琊郡長廣縣有萊山萊王祠
奚養澤在西秦地圖曰劇清池幽州藪寰宇記云萊
州萊陽縣本漢昌陽縣地故長廣城在縣東五十里
有萊王祠奚養澤在西方輿記要云獫養澤其地屬
幽州錄異記萊陽縣東北有蘆塘方八九頃深不可
測今涸地近高密故宜附見卷中又幽州之山鎮曰
醫無閭漢志遼東郡無慮縣應劭曰音閭師古曰即
所謂醫無閭今在廣寧城西五里也不特此也漢志
東萊郡腫縣之萊山祠居上山聲洋丹水所出丹東
北入海聲洋水寰宇記謂之清陽水側近與海畔之

梁山對方輿紀要云清陽水即清洋河在登州府福
山縣東十里北注于海聲清音相近黃縣有萊山松
林萊君祠臨朐縣有海水祠師古曰齊郡已有臨朐
而東萊又有北縣蓋各以所近為名寰宇記漢故城
去海三十里去海神祠約五六里曲成縣參山萬沙
陽卽山治水所出南至沂入海全氏曰曲成陽卽山
之治水何以得至沂入海說文云治水出東萊曲成
陽卽山南入海不云至沂也此水但當于膠灘之間
入海不應間關二千里歷濟淮二瀆至沂入海自續
志晉魏史志及李氏元和樂氏太平王氏元豐諸志
又皆無曲成治水之目則大可疑者竊謂出陽卽山
者非治水也乃沽水也左氏傳姑尤以西杜元凱曰
姑大沽水也尤小沽水也魏書地形志東萊郡長廣
縣有沽水寰宇記云沽猶即齊界然則漢志所云南
至沂者亦非沂也乃計斤之脫誤耳漢之曲成在今
掖縣小沽水出焉其東則黃縣大沽水出焉逕福山

而招遠而萊陽至于平度即墨之間而合流三百餘里自東而南直趨膠州之麻灣口明世議海運口者之道也故其時嘗有議東引沽河者其入海之處正漢計斤縣地東萊之水未有大于沽河者亦未古于沽河者次之則清陽水耳漢志說文皆誤以為治水而沽之名隱矣此與泰山郡南武陽冠石山之治水截然不同故分疏之如此按地理志瑯琊郡黔陬故介國也計斤莒子始起此後徙莒有鹽官師古曰即春秋左氏傳所謂介根也語有輕重東漢廢介根入黔陬又析置莒盧故續志東萊郡下云黔陬侯國故屬瑯琊有介亭劉昭補注云左傳襄公二十四年伐莒侵介根杜預曰縣東北計基城號介國計基即計斤也又莒盧有尤涉亭即姑尤之水入海之處金氏以漢志沂為計斤鑿然可據臨縣有百支萊王祠昌陽應劭曰昌水出師古注引此文于千乘郡博昌縣下不夜縣有成山日祠師古曰齊地記云古有日夜

出見于東萊故萊立此城以不夜為名是皆表表著
名卷中一不及之似脫去東萊一郡之水而不可考
矣

水經注釋卷二十六